

SA LETA TE PAULA KOARI NA TIE PA ROMA

Sa Vinabakala

Ta kubere koe Paula sa leta hie, pude na vina namanamana sa nana inene la koasa ekelesia pa Roma gua. Sa nana nati minizimizi si pude la tavetavete somanae paki koari na tie te Zisu Karisito vasina, meke koasa dia tinokae rini si pude hola la pa Sipeini, gua. Koasa nana leta si va bakalia sa koa rini sa nana ginilagilanana sa rinañerane meke sa tinoa tadina tie te Karisito. Va bakalā valeani sa sari doduru guguaana sa Inavoso Leana koasa leta hie.

Sipu beto zama qetuqetu na tozia sa sa nana tinokae koa rini pa vinaravara, si zama vura nia sa sa nati ginuana sa leta hie sapu guahe: “Ura va dogoroni gita sa Inavoso Leana te Zisu Karisito sa siranana gua meke va tonoto pule gita Tamasa si gita, podalae pa rinañerane meke tava hokoto tugo pa rinañerane.” (1:17) Beto asa si hoda la ia Paula sa nana binalabala sapu guahe: Ari doduru tie mo, sari na tie Ziu meke sari na tie Zenitailo^d si ta hivae beto mo pude tata pule mae koe Tamasa, sina lopu votivotikaedi si arini koasa niniranira tanisa sinea. Sea beto mo sarini meke lopu boka harupu puleni teledia si arini, ba pa korapa rinañerane mo si va tata pule lai Tamasa koa Sa sari na tie koe Zisu Karisito.

Beto asa si tozi va bakalia Paula sa tinoa vaqura tadina tie pu koa soto koe Karisito. Koa varibulei koe Tamasa si arini, meke sa

Maqomaqo Hope si vata rupahi si arini koasa niniranira tanisa sinea meke sa minate.

Pa hinia lima meke kamoā vesu si vari vivinei nia tugo Paula sa tinavete tanisa Tinarae te Mosese, meke sa niniranira tanisa Maqomaqona Tamasa pa tinoa tanisa pu va hinokara. Podalae pa hinia sia meke kamoā pa hinia manege eke, si balabala sisigitia e Paula sa ninanasa sapu vegugua meke kaqu boka varigotoi sari na tie Ziu meke sari na tie Zenitailo koasa minizimizi te Tamasa koari doduru tie, gua. Sa natina sa nana vivinei koasa gugua sa si guahe: Sa kiniluna e Zisu koari na tie Ziu kamahire si na kukuruna sa minizi mae te Tamasa pude di ta varigarae mae sari doduru tie pa korapa tataru variharupi te Tamasa koe Zisu Karisito. Meke va hinokaria Paula sapu pa vina betona sa totošo ta mutina si lopu kaqu tale kilua rina tie Ziu se Zisu, ba kaqu ta harupu tugo si arini.

Vina betobeto hokara, si kuberia Paula sa gugua sa kinokoa tanisa tie koe Karisito pa sirana tataru, sapu soto la koasa tinoa vari tatarue koari na votiki tie. Vivinei ni tugo sa sari na binalabala gugua hire: sa tinavete nabulu la koe Tamasa, sa tinavete tadina tie te Karisito koasa qinavuna, meke koari na tie te Karisito, meke sapu gua leana meke kaleana pa tinavete pude mada lopu ta zutu si gita pa nada binalabala. Sa nana inavoso telena koari nana baere, meke sa nana vinahesi la koe Tamasa si tozia sa pa vinabetona sa leta.

Sari na Nati Pinaqapaqahana sa Buka Hie

Vina bakalana meke sa nati binalabala. Hinia 1:1-17

Sa hiniva pude ta harupu sari na tie. Hinia 1:18 kamo hinia 3:20
Sa sirana tinaharupu te Tamasa. Hinia 3:21 kamo hinia 4:25
Sa tinoa vaqura koe Karisito. Hinia 5:1 kamo hinia 8:39
Sa minizimizi te Tamasa koari na butubutu Izireli. Hinia 9:1 kamo hinia 11:36
Hahanana leana pa tinoa koe Karisito. Hinia 12:1 kamo hinia 15:13
Vina betobeto meke sa qinetuqetu te Paula. Hinia 15:14 kamo hinia 16:27

Sari Zinama Tuketukele

¹ Arau Paula si kuberia sa leta hie. Arau si keke nabulu te Zisu Karisito. Ta tioko si rau pude na apositolo^d meke tava madi si rau pude tarae nia sa Inavoso Leana koari na tie.

² Sa Inavoso Leana hie si ele va tatara nia tu Tamasa pukerane koari Nana poropita, sapu gua ele ta kubere pa Kinubekubere Hope. ³ Sa Inavoso Leana si sa gugwana sa Tuna Tamasa, sapu sa nada Banara, se Zisu Karisito, sapu podo guana tie pa tutina e Devita. ⁴ Meke sa Nana tinoa tinamasa si vata dogoro va bakala koasa niniranira pa Nana tinuru pule pa minate, sapu na Tuna sa Tamasa lavata si Asa. ⁵ Pa korapa tataru variharupi te Zisu Karisito si ta vizata si rau koe Tamasa pude na Nana apositolo, pude tarae nia sa Inavoso Leana koari doduru tie pa ninae popoa, pude va hinokaria na va tabea rini si asa. Asa si tavetia Tamasa pude mani tava lavata se Karisito.

⁶ Gamu pu koa mia pa Roma ba ta tioko tugo koe Tamasa pude somana tugo koari na tie te Zisu Karisito. ⁷ Gua asa si kubere atunia rau koa gamu doduru tie te Karisito pa Roma sa leta hie. Gamu pu ta tatarue na ta tioko mia koe Tamasa, pude Nana tie soti, gua.

Mani ponini gamu sa Tamasa, sa Tamada, meke e Zisu Karisito sa Nada Baṇara sa tataru lopu ta ṇana kamona meke sa binule.

Sa Vinaravara Zama Leana

⁸ Kekenu si maqu zama leanani gamu rau si gamu doduru koasa qua Tamasa pa korapana Zisu Karisito, sina avoso nia rau sa inavosona sa mia rinaṇeraṇe sapu ta tozi urahae koasa kasia popoa. ⁹ Meke sa Tamasa tu si va sosodea sapu lopu hite mulinini gamu rau doduru totošo koari na qua vinaravara. Nabulu nia rau si Asa pa doduru buloqu sipu tarae vura nia rau sa Inavoso Leana koasa guguaṇa sa Tuna. ¹⁰ Hoke tepa ia rau sa Tamasa, meke be guana Nana hiniva kamahire si mani toka nau pude atu dogoro gamu. ¹¹ Ura okoro sisigiti nia rau si pude atu dogoro gamu. Pude maqu atu vivinei ni koa gamu sari na vinaritokae maqomaqo ta manaedi, pude va ṇinirai sari na maqomaqo mia. ¹² Sapu gunia rau si guahe: pude mada keke gua ta tokae beto mo si gita doduru. Gamu ta tokae pa qua rinaṇeraṇe, meke arau ba ta tokae tugo pa mia rinaṇeraṇe.

¹³ Gilania mia gamu na tasiqṇ koe Karisito sapu soku totošo si mizimizi atu si rau, ba koba ta hukata. Hiya vata evaṇae ni tie te Karisito pule rau si kaiqa tie koa gamu. Kekenonoṇo gua

tugo sapu ele eva_nia rau koari kaiqa votiki tie Zenitailo.* ¹⁴ Sina koa nana sa qua tinavete koa gamu doduru tie, koari na tie Quriki^d, meke koarini pu lopu na tie Quriki, meke koari na tie tumatumaedi meke sari na tie pupuhudi. ¹⁵ Gua asa ke okoro hola nia rau si pude atu tarae nia koa gamu na tie pa Roma sa Inavoso Leana te Zisu Karisito.

Sa Niniranira tanisa Inavoso Leana te Zisu Karisito

¹⁶ Lopu hite kurekure nia rau sa Inavoso Leana te Zisu Karisito hie, sina gilania rau sapu asa sa niniranira te Tamasa pude harupi sari doduru tie pu va hinokaria si Asa, kekenu koari na tie Ziu^d, meke gua tugo koari na tie Zenitailo^d.*

¹⁷ Ura ele va dogoroni gita sa Inavoso Leana te Zisu Karisito sa sirana gua meke va tonoto gita Tamasa si gita. Ta podalae pa rina_nerane meke tava hokoto tugo pa rina_nerane si asa. Gua asa sapu ta kubere koasa Kinubekubere Hope, sapu zama guahe: “Asa sapu tava tonoto koe Tamasa pa korapa rina_nerane si kaqu toa,” gua.*

Doduru Tie si Sea Beto

¹⁸ Ba sa binugoro te Tamasa si vura mae pa Manauru koari doduru sinea na kinaleadi tadi na tie pu hukatia sa hinokara. ¹⁹ Kaqu va kilasi Tamasa si arini, sina ele va dogoro ni tu Sa koa rini sa Nana tinoa soti, meke ele bakala valeana tu koa rini si Asa. ²⁰ Seunae gua kuria Tamasa sa kasia popoa si ele bakala mo koari

* **1:13** TTA 19:21 * **1:16** Mk 8:38 * **1:17** Hbk 2:4

na tie sa Nana Tinoa lopu ta dogorona, sapu sa Nana niniranira koa holana, meke sa Nana Tinamasa. Ta dogoro va bakala si arini koari doduru vina podaka saripu taveti Sa. Gua ke lopu boka zama kokoha sari na tie sapu lopu tumae nia rini sa Tamasa, gua. ²¹ Gilania dia mo sa Tamasa, ba lopu ponía rini sa vina lavata sapu garona Sa, meke lopu zama leana koa Sa si arini. Ba sari na dia binalabala na ginilagilana si ta eva^{nae} loke laedi meke siⁿⁱ na hinuporo si arini.* ²² “Tie tumatumae mami si gami” gua si arini, ba namuna duviduvilidi hokara mo. ²³ Vahesia rini sa Tamasa toa holana, gua si arini, ba sari na beku tu saripu tavete guni ri na kinehadi rina tie pu lopu kaqu koa hola, na kurukuru tapuru, na kurukuru name, meke na kurukuru gotolo si vahesi rini.*

²⁴ Gua asa ke luara lani Tamasa si arini koari na dia inokoro seadi pa bulodia meke taveti rini sari na tinavete variva kurekuredi pa vari korapadia. ²⁵ Hobe nia kinohakoha rini sa gugua^{na} hinokara sa Tamasa, meke vahesi tu rini sari na likakalae saripu taveti Sa, ba lopu vahesia rini si Asa pu tavetedi. Ura Asa tu si kaqu tavahesi ninae rane ka rane, Emeni.

²⁶ Gua asa ke luara lani Tamasa si arini, meke evaⁿⁱ rini sari na hahanana variva malederedi. Sari na barikaleqe si lopu haba tie ba haba barikaleqe tu, ba lopu gua sapu tavete ni Tamasa koa rini pa pinodalaena. ²⁷ Meke gua tugo sari na palabatu, veko pania rini sa siranana hinokara

* 1:21 Epi 4:17-18 * 1:23 Diut 4:16-18

sa hahanana tamaloana pude haba barikaleqe, meke ninira hola sa hiniva pude eko turana koreo na palabatu, meke evani rini sari na hahanana variva kurekuredi pa vari korapadia. Gua asa ke vagi pulea rini teledia sa vina kilasa padadi rina dia tinavete kaleadi.

²⁸ Koa gua sapu lopu balabala ia rini pude kopu nia sa tinumatumae hinokara te Tamasa, ke luara lani Sa koari na dia binalabala kaleadi pude taveti rini sari na tinavete kaleadi pu lopu pada koa rini pude taveti. ²⁹ Ta sinie doduru kinaleadi si arini; sapu sari na vinarivosa, na pinuhi, na ninovanovola, na kinonokono, na vina mate tie, na vinaripera, na sinekesekei, na balabala va kaleani sari na votiki tie, na vari nanaei, ³⁰ na vari zama va kaleani, meke kukiti nia rini sa Tamasa; vahesi pule ni, na va lavalavata pule ni, meke hatahata sirana pude tavete va kaleana, meke lopu va tabei tugo rini sari na tiatamadia. ³¹ Namu, loke dia binalabala leadi si arini. Lopu va gorevura i rini sari na dia vina tatara, meke loke dia tataru na vina tukana pa tie. ³² Gilania dia mo rini sa zinama te Tamasa sapu garodi tugo pude tava mate sari na tie pu tavete gua asa, gua. Ba tavete nono la i mo rini sari na sinea sara, meke va egoi tugo rini sari na tie pu tavete va kaleana gua arini.

2

Sa Vinaripitui te Tamasa

¹ Gua ke lopu kote boka sekesekei si gamu, ura be zutui gamu sari na votiki tie, si zutu puleni gamu mo telemia, sina gamu ba tavete kekenono

gua tugo arini.* ² Gilania nada gita sapu e Tamasa mo si toṇoto Nana pinitu koari na tie pu taveti sari na tiṇitoṇa gua arini. ³ Ba sapu gamu, totoṣo taveti gamu sari na ginugua arini telemia, meke zutui sari kaiḡa tie, si vegua, balabala ia gamu sapu kote boka govete nia gamu sa vinaripitui^d te Tamasa? ⁴ Ba hokara doṇo va karia tu gamu sa Nana tataru lavata meke sa Nana inaḡa va ṇoṇo koa gamu! Gilana valeania mia gamu sapu tataruni gamu sa Tamasa, sina korapa hivani gamu Sa pude luara pani gamu sari na mia sinea. ⁵ Ba sina luli mia hiniva sisigiti si gamu, ke lopu hiva luara pani gamu sari na mia hahanana kaleadi, gua asa ke tomo va noma puleni gamu vina kilasa telemia pa rane mumudi, pana kaqu vata dogoro nia Tamasa sa Nana binugoro meke sa Nana vinaripitui toṇotona. ⁶ Ura gua mo sapu tavetia ri hopeke tie, si kote ta pia nia rini koe Tamasa.* ⁷ Koa rini pu lopu makudo tavete valeana, meke hata ia rini sa tinoa marilaena, na vina lavata, meke sa tinoa sapu loke kokoina, si kote ponía Tamasa koa rini sa tinoa hola. ⁸ Ba koa rini pu balabala puleni meke kilua rini sa hinokara meke lulia rini sa sirāṇa koleanana, si kote vata dogoroni Sa sa Nana binugoro meke tinanaziri. ⁹ Na tinasuna meke na tinasigiti si kote kamo koari doduru tie pu tavete va kaleana, koa rina tie Ziu, meke gua tugo koari na tie Zenitailo. ¹⁰ Ba sa tinoa marilaena, na vina lavata, meke binule, si tadi doduru pu tavete valeana, koa rina tie Ziu meke

* **2:1** Mt 7:1; Lk 6:37 * **2:6** Sam 62:12; TTA 24:12

gua tugo koari na tie Zenitailo. ¹¹ Ura sa Tamasa si lopu toka kale pa tie.*

¹² Sari doduru tie Zenitailo saripu lopu gilania sa Tinarae te Mosese meke tavete va sea, si kaqu tava kilasa pa Heli koari na sinea pu taveti rini. Meke doduru tie Ziu pu gilania sa Tinarae te Mosese ba lopu lulia, si sea tugo; meke kaqu ta pitu koasa Tinarae te Mosese si arini. ¹³ Ura lopu arini pu avosia sa Tinarae te Mosese si toŋoto pa kenuna sa Tamasa, ba arini tu pu va tabea sa Tinarae si kote ta pozae na tie toŋoto. ¹⁴ Pana lulia rina tie Zenitailo sa Tinarae te Mosese saripu lopu gilania sa Tinarae, si va sosodea mo rini sapu sa Tinarae asa si koa pa bulodia. Ba lopu hite tiroa babe tagoa rini si asa. ¹⁵ Vata dogoro nia rini sapu sa Tinarae te Tamasa si ta kubere pa bulo dia, sina sa dia binalabala boka zutu i babe tozini sapu toŋoto sari na dia tinavete. ¹⁶ Meke gua tugo asa si kote ta evaŋa koasa rane vinaripitui, sapu pa korapana e Zisu Karisito, si kote pitui Tamasa sari na binalabala tomedi tadi na tie, gua tugo sapu hoke tarae nia rau koasa Inavoso Leana.

Sari na Tie Ziu meke sa Tinarae

¹⁷ Ba vegua si gamu kasa pu poza puleni gamu na tie Ziu? Kalavarae si gamu pa Tinarae te Mosese, meke zama sapu na tie te Tamasa si gamu, gua. ¹⁸ Tumae nia gamu sapu gua hiva nia sa Tamasa koa gamu, meke tava tumatumae si gamu koasa Tinarae te Mosese gua sapu toŋoto pude tavetia. ¹⁹ Zama si gamu sapu na tie

* **2:11** Diut 10:17

tuturana tadi pu behudi si gamu, meke sari na mia zinama si guana kalalasa koari na tie huporo. ²⁰ Meke na tie va tumatuma^e koarini pu pupuhu meke na titisa tadi na tie vaqura si gamu. Meke zama si gamu sapu sa natina sa tinumatuma^e hinokara, si koa koasa Tinarae te Mosese, gua. ²¹ Ego, variva tumatuma^e si gamu koari kaiqa, ba vegua ke lopu boka va tumatuma^e puleni gamu? Zama si gamu, “Meke mu hiko,” gua; ba vegua lopu hite hiko si gamu? ²² Zama si gamu, “Meke mi barabarata,” gua. Ba vegua, lopu hoke barabarata si gamu? “Namu lopu leana si pude vahesi beku,” gua si gamu. Ba vegua, lopu hikoi gamu sari na tinito^{na} pu koa koari na zelepade tadi na tamasa huporodi? ²³ “Tumae nia gami sa Tinarae te Tamasa,” gua si gamu; ba vegua ke sekea gamu sa Nana Tinarae, ke lopu pama^{na} nia rina votiki tie sa Tamasa? ²⁴ Zama guahe sa Kinubekubere Hope: “Ura koa gua koa gamu na tie Ziu, si zama va kaleania rina tie Zenitailo sa pozana sa Tamasa,” gua.*

²⁵ Be guana lopu sekei gamu sari na Tinarae te Mosese si kote arilaedi sari na mia minagu^d. Ba be sekei gamu sari na Tinarae te Mosese, si loke laedi tugo sari na mia minagu. ²⁶ Gua asa ke sari na tie Zenitailo pu lopu ta magudi^d, ba va tabei rini sari na gorena ka sarena pa Tinarae te Tamasa, si kekenono^{mo} pa dino^{no} te Tamasa koari na tie Ziu pu ta magudi. ²⁷ Tagoa gamu na tie Ziu sa Tinarae te Tamasa, meke ta magu si gamu; ba sari na tie Zenitailo pu lopu ta magudi,

* **2:24** Ais 52:5

ba va tabea sa Tinarae te Tamasa, si kaqu zutu gamu rini si gamu, sina lopu va tabea gamu sa Nana tinarae. ²⁸ Ura lopu sari na tie Ziu pa tinoa tini mo si na tie hinokara te Tamasa, meke lopu na minagu mo si vata dogoro nia sapu na tie te Tamasa, meke ta qetue koa Sa si gamu. ²⁹ Ba sa tie Ziu hinokara si na tie sapu ta hobe sa bulona koasa Maqomaqona sa Tamasa, ba lopu koasa tinarae ta kuberena mo. Sa tie gugua asa si lopu hata vina lavata pa tie ba koe Tamasa tu.*

3

¹ Na sa si leana nia rina tie Ziu hola ni sari na tie Zenitailo? Lopu arilaena tu sa minagu? ² Uve, arilaena hola si pude na tie Ziu; sina kekenu si va ronu nia Tamasa koari na tie Ziu sa Nana zinama. ³ Ba vegua be kaiqa arini si loke dia rinanerane koa Sa? Be gua asa si vegua, e Tamasa ba lopu kaqu kopu nia sa Nana vinariva egoi koa rini? ⁴ Lokari hokara! Be guana kokoha sari doduru tie ba sa Tamasa si lopu boka kokoha. Sina guahe si zama nia sa Kinubekubere Hope:

“Sari na tinoni si kaqu va sosodea sapu hinokara sa Mua zinama,
meke toŋoto si Goi pa vinaripitui,” gua.*

⁵ Vegua be sa nada tinavete sea, si va vura va bakala nia sapu gotogoto sa pinitu te Tamasa koa gita? Na sa pule si kote zama nia gita? Lopu toŋoto tu sapu va kilasa gita sa Tamasa si gita? Hoke balabala gua asa sari tie. ⁶ Lokari hokara! Be lopu toŋoto sa Tamasa, si vea meke kote boka

* 2:29 Diut 30:6 * 3:4 Sam 51:4

pitua Sa sa kasia popoa? ⁷ Ba be zama guahe si keke tie: “Be sekea rau sa tinarae te Tamasa, si ta dogoro va bakala sapu kopu ni Tamasa sari Nana zinama, pude mani tavahesi. Ba vegua ke korapa ta zutue tie sea tu si rau?” ⁸ Ego, vegua mada zama kokoha kekenoŋo gua rina tie sekesekei pu zutu gami sapu zama guahe si gami, gua, koa ri mami vina tumatumae sapu guahe: “Mada tavete va kaleana pude mani ta dogoro sa lineana te Tamasa,” gua? Lokari hokara, arini pu zama gua asa si garodi pude tava kilasa koe Tamasa.

Loke Tie si Toŋoto

⁹ Ke vegua, gita na tie Ziu si leana hola ni sari na tie Zenitailo, gua? Lokari hokara! Ele tozini gamu tu rau sapu sari na tie Ziu meke sari na tie Zenitailo si kekenoŋo mo. Ta pusi varigara mo pa niniranira tanisa sinea si gita doduru. ¹⁰ Ura sa Kinubekubere Hope, si zama guahe:

“Loke tie si toŋoto,

namu loketoŋa hokara!”*

¹¹ Loke tie si gilagilana,

lopu keke sapu hata ia sa Tamasa.

¹² Doduru tie si luara pania sa Tamasa;

ke sea beto mo sari doduru;

loke tie si tavetia gua sapu leana,

namu loketoŋa hokara.

¹³ Sari nuzudia si guana lovu ta tukeledi;

meke tale zama kokoha mo sari meadi.

Sa poizini tadi na noki variva mate si koa mo pa beru dia.*

* **3:10** Sam 14:1-3, 53:1-3

* **3:13** Sam 5:9, 140:3

14 Meke sari na leodi si ta siñie lineveleve kaleadi hola.*

15 Sari nenedi si tuturei haqala la pude va mate tie;*

16 meke vasina la gua rini si vata sigiti na vata sunai rini sari na tie,

17 meke sa sirāna tanisa binule si lopu hite tumae nia rini;

18 meke namu lopu hite matagutu nia rini sa vina kilasa te Tamasa,” gua.*

19 Ego, kamahire si gilania gita sapu sari doduru pu zama ni sa Tinarāe te Tamasa si ta zamae koa rini pu koa ta kopue koasa Tinarāe sana, pude kaqu tava noso sari na vina ririunae tana tie; meke pude sari doduru tinoni pa kasia popoa si kaqu ta pitu koe Tamasa. 20 Gua ke loke tie hokara si boka ta pozae na tie toñoto totošo pitua Tamasa si asa koasa vina tabena sa Nana Tinarāe. Ba sa tinavete tanisa Tinarāe te Tamasa si pude vata gilana nia mo koasa tie sapu sea si asa.*

Tava Toñoto pa Rinañerāne si Gita

21 Ba kamahire si vata dogoro nia Tamasa sa sirāna gua sapu va toñoti Sa sari na tie, ba lopu pa ginuguana sa Tinarāe. Ura sa Tinarāe te Mosese meke sari na poropita si ele tozi va sosodea koa gita sa sirāna asa. 22 Sa tinoñoto te Tamasa asa si vagia arini pu va hinokara ia se Zisu Karisito pa korapana sa dia rinañerāne koa Sa. Loke vinotikaena si koa koari doduru, be

* 3:14 Sam 10:7 * 3:15 Ais 59:7-8 * 3:18 Sam 36:1 * 3:20 Sam 143:2; Qal 2:16

esei si arini,* ²³ ura ele tavete va sea sari doduru tie, ke lopu hite nana kamo rini sa tinoto te Tamasa. ²⁴ Ba koasa tataru variharupi sapu poni moka nia Tamasa si tava toto sari doduru tie pu va hinokara. Vata evania Tamasa si hie koe Zisu Karisito pu vata rupahi si arini. ²⁵ Asa tu si garunu mae nia Tamasa pude na vina vukivukihi tana vulasa palae sinea tadirini pu ranea sa eharana Sa. Taleosae sari na dia sinea koari na dia rinerane koa Sa. Sa vinukivukihi hie vata dogoro nia sa Nana nino toto tupe pule sa Tamasa meke lopu va kilasi Sa sarini pu tavete va sea pa toto ele hola. ²⁶ Evania Tamasa si hie pude tavete vura nia sa Nana nino koari doduru, ura na no si Asa koari doduru tie sea, ba tozi vura nia Sa sapu sari tie sea si ta pozae na tie toto pa kenuna Sa pana va hinokaria rini se Zisu Karisito.

²⁷ Vegua, boka zama va titie si gita, sapu pa nada vina tabena sa Tinarae te Mosese si ta pozae na tie toto si gita koe Tamasa? Lokari hokara! Lopu pa vina tabena sa Tinarae, ba pa rinerane koe Karisito. ²⁸ Ura gilaria gita sapu tava toto koe Tamasa sa tie pa korapa nana rinerane tu koe Zisu Karisito, lopu pa kinopuna sa Tinarae. ²⁹ Ba vegua, tadi na tie Ziu eke mo sa Tamasa? Lokari, tadi na tie Zenitailo tugo. ³⁰ Kekeke mo sa Tamasa. Asa mo kote va toto sari na tie Ziu pa dia rinerane meke sari tie Zenitailo pa dia rinerane tugo asa.* ³¹ Ke vegua, mada veko pania sa Tinarae, mada lulia mo sa rinerane? Lokari hokara! Sipu vagia

* 3:22 Qal 2:16 * 3:30 Diut 6:4; Qal 3:20

gita sa rinanerane si tiqe va gorevura ia gita sa natina sa Tinarae.

4

Sa Rinanerane te Ebarahami

¹ Ke na sa si kote zama nia gita koasa gugwana e Ebarahami, sa tamada gita na tie Ziu? Na sa si boka gilania gita koasa gugwana sa nana rinanerane koe Tamasa? ² Be koari na tinavete leadi pu taveti sa si poza nia tie tonoto Tamasa si asa, si kote boka vahesi pule nia pa nana zinama si asa. Ba lopu kaqu boka vahesi pule nia si asa pa kenuna sa Tamasa. ³ Ura zama guahe sa Kinubekubere Hope: “Ranea Ebarahami sa Tamasa, meke koasa nana rinanerane si poza nia na tie tonoto Tamasa si asa.”*

⁴ Totoso tavetavete sa tie koa keke tie si lopu na vinariponi si vagia sa, ba na tinabara tu padana sa tinavete. ⁵ Ego, sa tie pu lopu kalavarae pa nana tinavete leadi pu taveti sa, ba kalavarae koe Tamasa pu poza nia tie tonoto Sa sa tie sea pa nana rinanerane, si pa nana rinanerane mo si vata evanae nia tie tonoto Tamasa sa tie sana. ⁶ Kekenono gua tugo asa sapu zama nia Devita, totozo tozia sa gugwana sa tie tamanaena sapu vata evanae nia tie tonoto Tamasa, ba lopu koari nana tinavete leadi pu taveti sa.

⁷ “Tamanae tugo sari na tie pu taleosoni Tamasa sari dia tinavete kaleadi,
meke tava murimuri palae sari dia sinea.*

* **4:3** Zen 15:6; Qal 3:6 * **4:7** Sam 32:1-2

⁸ Tamanae tugo sa tie sapu lopu kote balabala pulei Tamasa sari nana sinea.”

⁹ Vegua sa tinamanae sapu zama nia Devita hie? Tadi na tie Ziu pu ta magudi^d mo? Lokari hokara! Tadi pu lopu ta magudi tugo. Ura ele tozia tu rau sapu gua koa pa Kinubekubere Hope: “Raṇea Ebarahami sa Tamasa, meke koasa nana rinaṇeraṇe si poza nia na tie toṇoto Tamasa si asa.” ¹⁰ Pa totošo sa, si ta evaṇa sapu gua asa? Pa totošo sipu lopu ele ta magu se Ebarahami, ba pa mudina tu sipu ele ta magu sa? Pa totošo sipu lopu ele ta magu tu sa. ¹¹ Sa minagu si ta evaṇa mumudi mo, ke na vina gilagilana mo sa nana rinaṇeraṇe koe Tamasa si asa. Ele poza nia tie toṇoto tu Tamasa si asa, sipu lopu ele ta magu tu sa. Ke se Ebarahami si guana tamadia ri doduru tie pu raṇea sa Tamasa, meke ta pozae tie toṇoto koa Sa, be vea ta magudi babe lopu ta magudi.* ¹² Meke asa tugo sa tamadia rina tie Ziu pu ta magudi. Ba lopu koasa tinamagudi si ta evaṇae nia tamadia rini se Ebarahami, ba koasa dia tinoa raṇeraṇe tu totošo keha lulia rini sa rinaṇeraṇe te Ebarahami, sapu tagoa sa totošo lopu ele ta magu tu.

Sa Vina Tatara te Tamasa koa Rini pu Kalavarae koa Sa

¹³ Lopu koasa vina tabena sa Tinarae te Mosese si vagi nia Ebarahami, meke rina tutina sa vina tatara sapu kaqu tagoa rini sa popoa pepeso. Ba sina raṇea Ebarahami sa Tamasa, ke vagia sa sa tinoto koa Sa.* ¹⁴ Ego, be vagia rini sapu gua

* **4:11** Zen 17:10 * **4:13** Zen 17:4-6, 22:17-18; Qal 3:29

va tatara nia sa Tamasa, sina va tabea rini sa Tinarae te Mosese, si kote loke gugwana sa dia rinañerane koe Tamasa, meke sa vina tatara ba kote loke laena tugo.* ¹⁵ Sa Tinarae te Mosese si va mae ia sa binugoro te Tamasa koa rini pu lopu va tabea si Asa, ba vasina sapu loke Tinarae, si loketona tugo sa sineke Tinarae.

¹⁶ Gua asa ke koasa rinañerane mo si ta vagi sa vina tatara, pude va sosode vaeana sapu gua poni moka nia Tamasa koari doduru tie pu tuti lulia se Ebarahami pa rinañerane. Ke sa vina tatara hie si lopu tadirini mo pu va tabea sa Tinarae te Mosese, ba tadirini tugo pu rane sa Tamasa, kekenono gua tugo e Ebarahami. Ura se Ebarahami si na tamada gita doduru pu rane sa Tamasa.* ¹⁷ Gua sapu zama nia sa Kinubekubere Hope: “Vata evane nigo Arau na tamadia ri soku butubutu si goi.” Ke sa tamada gita si asa pa kenuna sa Tamasa, sa Tamasa sapu rane sa. Asa sa Tamasa sapu va toa puledi ri pu matedi, meke va podakadi sari doduru likakalae saripu lopu ele tava podaka.*

¹⁸ Va hinokaria Ebarahami sa Tamasa, ba pa binalabala tadi na tie si tasuna pude ta evana si asa. Gua asa ke ta evane na tamadia ri soku butubutu si asa. Gua tugo sapu zama nia sa Kinubekubere Hope: “Kaqu soku gua tugo rina pinopino pa manauru sari na tudia rina tumu,” gua.* ¹⁹ Koa sa totošo hie si ele tata keke gogoto vuahenina se Ebarahami, ba lopu hite malohoro sa nana rinañerane koe Tamasa. Sa

* 4:14 Qal 3:18

* 4:16 Qal 3:7

* 4:17 Zen 17:5

* 4:18

Zen 15:5

tinina si balabala gunia sa sapu tata matena, gua, meke gua tugo se Sera, sapu tige, gua.* ²⁰ Ba va hinokara sisigitia Ebarahami sa vina tatara te Tamasa, ke ninira lalanana sa nana rinaṇerane, meke lopu hite nunala si asa, ba vahesia sa sa Tamasa. ²¹ Tumae valeana nia Ebarahami sapu kote boka va gorevura ia Tamasa sa Nana vina tatara koa sa. ²² Gua asa, ke “Ta pozae na tie toṇoto” koe Tamasa se Ebarahami koasa nana rinaṇerane. ²³ Ego, sa zinama sapu, “Ta pozae tie toṇoto si asa,” gua, si lopu ta kubere pa Kinubekubere Hope pude te Ebarahami eke mo, ²⁴ ba pude tadigita tugo si asa. Ura gita ba kaqu pozani gita tie toṇoto tugo Tamasa pa nada rinaṇerane, sina va hinokaria gita si Asa pu va toa pulena sa Baṇara Zisu Karisito pa minate. ²⁵ Mate hobei Zisu Karisito sari nada sinea, meke tava turu pule si Asa pa minate pude tava toṇoto koe Tamasa si gita.*

5

Tava Toṇoto koe Tamasa si Gita

¹ Gua ke, sina pa nada rinaṇerane si tava toṇoto si gita, ke koa bule koe Tamasa si gita, pa korapana Zisu Karisito sa nada Baṇara. ² Pa korapa nada rinaṇerane koe Karisito si va kamo lani gita Sa koasa Nana tataru variharupi, sapu koa ia gita kamahire. Ke getugetu tugo si gita sina gilania gita sapu kote somana tagoa gita sa tinoa marilaena te Tamasa. ³ Lopu asa mo, ba mada getugetu tugo koari nada tinasuna. Ura

* **4:19** Zen 17:17 * **4:25** Ais 53:4-5

koari nada tinasuna na tinasigiti tugo si kote va nonoga ia gita pude nono meke soto va nabu pa rinañerane. ⁴ Meke koasa nada tinuru va nono meke va nabu si kote vagia gita sa hahanana sapu qetu nia Tamasa, totošo aqa va nono si gita pa Nana vinatatar. ⁵ Meke totošo aqa va nono si gita koasa Nana vina tatara si lopu kaqu hite kurekure si gita, sina ta zoropo vura koe Tamasa sa Nana tataru pa korapa buloda koasa Maqomaqo Hope sapu ele ponini gita Sa.

⁶ Pa totošo gotona sipu lopu boka harupu puleni gita si gita, si mae mate paeni gita Karisito, pude harupu gita koari nada kinaleana. ⁷ Tasuna hola si pude mate hobeke keke tie si keke tie toñoto; ba be leana sa tie, si hokara kote hiva mate hobeke sa si keke tie. ⁸ Ba sipu korapa koa tie sea si gita si mate paeni gita Karisito, pude va dogoroni gita Tamasa sa Nana tataru lavata. ⁹ Gua asa ke gilana valeania gita sapu kaqu harupu puleni gita Zisu Karisito, koasa tinañaziri te Tamasa pa totošo varipitui, sina va toñoto gita Tamasa si gita koasa eharana Sa. ¹⁰ Ura sipu korapa kana ia gita sa Tamasa si tavetia Sa sa vinariva bulei koa gita, koasa minate tanisa Tuna pa korosi. Ke koa gua sapu koa bulei si gita koe Tamasa kamahire, ke mada tumae valeana nia sapu kaqu ta harupu si gita, sina toana se Karisito. ¹¹ Ba lopu asa mo, mada qetu nia gita sa nada binaere leleana koasa Tamasa, sina ele tavetia Zisu Karisito, sa nada Bañara, sa vinari bulei.

Adama meke Karisito

12 Gua ke, koa gua koasa tinavete tanisa keke tie si kamo sa sinea koasa kasia popoa, meke koasa sinea si kamo sa minate tanisa tie asa, meke sa minate asa si kamo la koari doduru tie, sina sea beto sari doduru tie.* 13 Ura sipu lopu ele ta poni nia e Mosese koe Tamasa sa Tinarae, si ele koa nana tu sa sinea koasa kasia popoa, ba vasina sapu loketona sa tinarae, si lopu kaqu ta zutu nia rini sa sinekena sa tinarae. 14 Gua, ba podalae koasa totošo te Adama^d meke kamoa sa totošo te Mosese, sa minate si kamo la koari doduru tie. Sa minate si kamo la tugo koa rini pu tavete va sea ba lopu sekea rini keke tinarae gugua tavetia e Adama totošo sekea sa sa tinarae sapu avoso sotia sa koe Tamasa.

Ba se Adama si na kinehana mo e Zisu sapu luli mudi mae koa sa. 15 Ba sa tinonoto sapu poni moka nia Tamasa pa korapa Zisu Karisito si lopu kekenono sa sinea te Adama. Hinokara sapu koa gua koasa sinea te Adama si mate nia ri soku tie; ba sapu arilaena hola si na tataru variharupi te Tamasa koari soku tie. Arini si vagi va sokua totošo pozani “Tie tonoto” Sa si arini, koa gua koasa tataru variharupi tanisa keke tie sapu e Zisu Karisito. 16 Meke gua pule he: Sa vinariponi te Tamasa si lopu kekenono gua sa sinea tanisa keke tie. Ura koasa sinea tanisa keke tie, sari doduru si ta zutu pude tava kilasa koari na dia sinea. Ba sipu tavete va sea sari soku tie, si poni moka nia Tamasa sa Nana tataru variharupi, meke pozani tie tonoto Sa si arini. 17 Hinokara sapu koasa sinea tana keke tie, si mate nia ri

* 5:12 Zen 3:6

doduru tie. Ba sapu arilaena hola si gua tu sapu evania keke tie pule, sapu e Zisu Karisito! Ke sari doduru pu somana tagoa sa tataru variharupi te Tamasa, meke sa Nana vinariponi moka tanisa tinonoto, si kaqu somana tagoa sa tinoa hola koe Zisu Karisito.

¹⁸ Ura koasa sinea tanisa keke tie sapu e Adama si ta zutu sari doduru tie, ba koa sa tinavete tonoto tanisa keke tie, sapu e Zisu Karisito si boka ta pozae tie tonoto sari doduru tie, meke ponini Sa koarini sa tinoa. ¹⁹ Ke gua sapu koasa sineke tinarae tanisa keke tie si pozani tie sea Tamasa sari doduru tie, ba koasa vinatabe tanisa keke tie sapu Zisu Karisito, si boka tava tonoto koe Tamasa sari doduru pu va hinokara.

²⁰ Ta vala sa Tinarae te Mosese pude tumae valeana ni rini sari dia sinea, ba vasina sapu ta tumae valeana sa sinea si soku nono latu sa tataru variharupi te Tamasa. ²¹ Gua sapu sa sinea kamo la koari doduru tie meke kamo sa minate koari doduru, ke sa tataru variharupi si kamo koari pu ta pozae na tie tonoto pa korapana Zisu Karisito sa nada Banara pude va kamoi pa tinoa hola.

6

Luaria sa Sinea pude Toa koe Karisito

¹ Ego, na sa si kaqu boka zama nia gita? Mada tavete sinea nono latu pude noma nono latu sa tataru variharupi te Tamasa koa gita? ² Lokari hokara! Sina ele mate luara pani gita sari na sinea koe Karisito, ba vegua ke kote tavete nono lai mo sari na sinea? ³ Gilania mia gamu sapu

gita doduru pu ta papitaiso nia se Zisu Karisito si somana ta papitaiso pa korapana sa Nana minate. ⁴ Pa nada pinapitaiso si ta pomunu turanae koa Sa si gita, meke somana nia gita sa Nana minate, pude gua sapu ele va toa pulea sa Tamana pa Nana niniranira se Zisu Karisito pa minate, si toa si gita pa tinoa vaqurana.*

⁵ Be guana ele koa keke koa Sa si gita pa Nana minate si kaqu koa keke tugo koa Sa si gita pa Nana tinuru pule. ⁶ Gilania gita sapu sa nada tinoa koana si ele tava mate turanae koe Karisito pa Nana korosi, pude lopu koa hola si gita koasa niniranira tanisa sinea, ke lopu kaqu nabulu nia gita sa sinea kamahire. ⁷ Ura totooso mate sa tie si ta rupaha si asa koasa niniranira tanisa sinea. ⁸ Be guana ele mate turania gita se Karisito, si va hinokaria gita sapu kaqu toa turania tugo gita si Asa. ⁹ Gilania gita sapu sina ele toa pule se Karisito pa minate, ke lopu kaqu mate pule hokara si Asa. Na minate si loke nana niniranira koa Sa. ¹⁰ Sa minate sapu mate nia Karisito kekeke totooso mo, si na minate tanisa sinea. Ba sa tinoa sapu toa nia Sa kamahire, si toa koasa Tamasa. ¹¹ Koasa sirana tugo asa, si mi balabala guni pule ni gamu sapu mate si gamu koasa sinea, ba toa si gamu koe Tamasa pa korapana Zisu Karisito.

¹² Gua ke mi lopu va malumia sa sinea pude banara ni sari tini mia, mi lopu va tabei sari inokoro tanisa sinea. ¹³ Mi lopu va malumu hokaria keke kukuru tinimia koasa sinea, pude tavetavete ni pa kinaleana. Ba mi poni koe

* 6:4 Kol 2:12

Tamasa sari na mia tinoa, guana tie tava turu mia pa minate. Mi poni lani sari doduru tinimia koe Tamasa, pude tavetavete ni pa tinonoto. ¹⁴ Ura lopu kaqu va banaria gamu pa mia tinoa sa sinea, ura lopu sa Tinarae si toa nia gamu kamahire ba sa tataru variharupi tu te Tamasa.

Pinausu Tana Tinonoto

¹⁵ Ke vegua si gita? Mada tavete va sea, sina lopu na Tinarae si lalae nia sa nada tinoa, ba sa tataru variharupi tu te Tamasa? Lokari hokara! ¹⁶ Gilania mia sapu be vala puleni gamu koa keke tie si gamu pude na pinausu, si na pinausu tugo si gamu koa sa pu va tabe ia gamu; be na pinausu si gamu koasa sinea si kote kamo pa minate, ba be na pinausu si gamu koasa vina tabe si kote kamo pa tinonoto koe Tamasa. ¹⁷ Koari na toতো ele hola, si na nabulu si gamu koasa sinea. Ba kamahire mada zama leana koasa Tamasa sapu va tabea gamu pa doduru bulomia sa vina tumatumaе sapu ta poni nia gamu. ¹⁸ Kamahire si ta rupaha koasa sinea si gamu, meke ta evaṇae na pinausu tanisa tinonoto si gamu. ¹⁹ Va padapadae nia rau sa tinoa pinausu pude va bakalia sapu gua korapa va tumatumaeni gamu rau, sina malohoro sari mia binalabala. Gua sapu va pinausu puleni gamu koasa kinaleana, na hahanana bonidi pa doduru kukuru tinimia, pude tava soku sari na mia tinavete kaleadi, si mi va pinausu puleni gamu pude nabulu nia sa tinonoto pa doduru kukuru tinimia, pude tava soku sari na mia tinavete tonotodi.

²⁰ Totoso na pinausu si gamu koasa sinea, si lopu lulia gamu sa tinonoto. ²¹ Na sa sa lineana sapu vagia gamu koari na hahanana variva kurekuredi saripu taveti gamu? Sa vina betodi rina tinavete gugua arini sina minate mo. ²² Ba kamahire si ta rupaha si gamu koasa niniranira tanisa sinea, meke ta evanae na pinausu te Tamasa si gamu. Ke sa laena sapu vagia gamu si na tinoa tava madina, meke sa vina betona sina tinoa hola. ²³ Ura sa tinabara tanisa sinea si na minate tugo, ba sa vinariponi moka te Tamasa si na tinoa hola pa korapa Zisu Karisito sa nada Banara.

7

Vina Padapadae pa Vinarihaba

¹ Kasa tasiq koe Karisito, ele gilania mia mo gamu kasa sapu gua hiva zama nia rau kamahire, sina ele tumae nia gamu sa tinarae. Sa tinarae si ari nana niniranira koari na tie, totoso toa mo si arini. ² Gua sapu zama nia sa tinarae koasa barikaleqe varihabana, sapu ta pusi si asa koasa nana palabatu totoso toa nana si asa, ba pana mate sa nana palabatu, si ta rupaha si asa koasa tinarae pa nana vinarihaba. ³ Gua asa, ke be koa turania sa si keke votiki tie, totona sapu korapa toa sa nana palabatu, si barabarata tugo si asa, ba pana mate sa nana palabatu, si ta rupahana si asa koasa tinaraena sa vinarihaba, meke be varihaba pule sa barikaleqe ba lopu barabarata si asa.

⁴ Gua asa ke ta rupaha si gamu koasa Tinarae te Mosese koasa minate te Karisito. Ke kamahire

si soto koe Karisito meke tanisa tugo si gita, Asa sapu ele mate meke toa pule, pude boka vua va sokusoku si gita koe Tamasa. ⁵ Ura pa totošo sapu luli gita sari na hiniva kaleadi tanisa tini, si va ninira ia sa Tinarae te Mosese sa hiniva tanisa sinea pude vua sa kinaleana, meke kamo pa minate. ⁶ Ba kamahire si ele ta rupaha si gita koasa Tinarae te Mosese sapu vata pusi gita visoroihe. Ura ele mate luaria gita si asa. Ke kamahire si lopu nabulu nia gita sa Tinarae sapu ta kuberena koe Mosese, ba nabulu nia tu gita sa Tamasa pa tinoa vaqura koasa Maqomaqo Hope.

Sa Tinarae te Mosese meke sa Sinea

⁷ Na sa si kaqu zama nia gita? Koa ia sinea sa Tinarae te Mosese? Lokari hokara! Be lopu koa sa Tinarae si lopu kote tumae nia rau sa sinea. Be lopu zama sa Tinarae te Mosese: “Mu lopu okoro nia si keketona tadi na tie,” gua, si lopu kote tumae nia rau sa inoko'okoro sea.* ⁸ Ba sipu avosia rau sa tinarae hie, si la sa sinea va gevuria sa inoko'okorodi rina tinitona tadi na votiki tie. Ba sipu lopu ele gilania rau sa Tinarae te Mosese, si lopu gilania rau sa sinea. ⁹ Totoso lopu ele gilania rau sa Tinarae si toaqu, gua si rau, ba sipu avosia rau sa Tinarae, si toa vura mae koa rau sa sinea, ¹⁰ ke mate si rau. Ke sa Tinarae sapu tava mae pude va toa tie gua, si va mate au tu sa. ¹¹ Meke sa sinea si vagi lolomo koasa Tinarae meke sekesekei nau sa, meke va mate au.*

* **7:7** Ekd 20:17; Diut 5:21 * **7:11** Zen 3:13

¹² Gua asa ke sa Tinarae te Mosese telenā si hopena, meke sa tinarae pude lopu okokoro si hopena tugo, meke tonoto na leana si asa. ¹³ Ke vegua, sa Tinarae sapu leana si va mate au si arau? Lokari hokara! Sa sineā tu si tavetavete nia sa Tinarae sapu leanana meke va mate au si rau, pude mani ta dogoro sapu kaleana hola la tu sa sineā. Ke koasa Tinarae si ta dogoro sapu kaleana hola sa sineā.

Vinaripera pa Korapa Tinoa Tie

¹⁴ Ura gilania nada gita sapu sa Tinarae te Mosese si mae guana koe Tamasa, ba arau sina tie tana tini mo, meke na pinausu tanisa sineā.

¹⁵ Lopu tumae valeana nia rau sapu gua tavetia rau. Ura lopu tavetia rau gua sapu hiva nia rau, ba sa kinaleana tu sapu kukiti nia rau, si asa tu si tavetia rau. ¹⁶ Ego, be tavetia rau sapu gua lopu hiva tavetia rau, si ta dogoro mo sapu va egoa rau sapu leana sa Tinarae. ¹⁷ Ke lopu arau soti tavetia sa kinaleana hie, ba sa sineā tu sapu koa koa rau; asa tu tavetia si asa.* ¹⁸ Gilania rau sapu loke lineana si koa koa rau pa qua hiniva kaleadi pa tini. Ura koa nana sa qua hiniva pude tavete va leana, ba lopu boka tavete vura nia rau. ¹⁹ Lopu tavetia rau sa lineana sapu hiva tavetia rau, ba gua tu sapu lopu hiva tavetia rau si tavete nono laia rau. ²⁰ Ego, be tavetia rau sapu gua lopu hiva tavetia rau, si lopu arau tu tavetia si asa, ba sa sineā tu sapu koa koa rau; asa tu tavetia.

²¹ Ke asa mo sapu dogoria rau korapa ta evāna koa rau kamahire sapu guahe: pana hiva tavete

* **7:17** Qal 5:17

valeana si rau, si na hiniva pude tavetia sa sinea tu si koa tugo koa rau. ²² Ba pa korapa buloqu si getugetu nia rau sa Tinarae sapu mae guana koe Tamasa. ²³ Ba dogoria rau si keke hiniva kaleana sapu tavetavete pa tiniqu, sapu varipera la koasa hiniva leana pa qua binalabala meke vata pusi au koasa hiniva tana sinea sapu tavetavete pa korapa tiniqu. ²⁴ Kei! Namuna tie talotanaqu mo si rau. Esei si kote harupau koasa hiniva tana sinea pa tiniqu sapu korapa turana lani au pa minate? ²⁵ Ba vahesia rau sa Tamasa sapu harupau koe Zisu Karisito sa nada Baṇara! Sa inolana si guahe: Pa qua binalabala si nabulu nia rau sa Tinarae te Tamasa, ba sa hiniva tana kinaleana pa tiniqu si nabulu nia sa sinea.

8

Tinoa pa Korapa Maqomaqo

¹ Gua ke loke tie si boka zutu gita pu koa koe Karisito kamahire sapu garo si gita pude tava kilasa pa Heli. ² Ura sa niniranira tanisa Maqomaqo Hope, sapu va toa gita si gita koe Zisu Karisito, si vata rupaha gita koasa niniranira tanisa sinea meke sa minate. ³ Evanġia Tamasa, gua sapu lopu boka evanġia sa Tinarae te Mosese, sina tava malohoro si asa koasa hiniva tana kinaleana pa tini. Gua asa ke garunia Sa sa Tuna soti, pude mae podo kekenoṇo gua ri doduru tie pa tinoa tini, pude na vinulasana sa sinea, meke pude zutua meke va kilasia Sa sa sinea tana hiniva kaleana pa tinida. ⁴ Evanġia Tamasa si hie, pude sa tinonoto sapu ta hivae koasa Tinarae te Mosese, si kaqu tava gorevura koa gita pu

ene pa korapa Maqomaqo Hope, ba lopu koasa hiniva kaleana tanisa sinea pa tinida. ⁵ Ura arini pu lulia sa hiniva kaleadi tana sinea pa tinidia si ta pusi koasa hiniva tanisa sinea. Ba arini pu lulia sapu gua tozi ni sa Maqomaqo Hope, si soto sari dia binalabala koasa hiniva tanisa Maqomaqo Hope. ⁶ Ba be ta pusi si gita koasa hiniva tanisa sinea, si kote kamo pa minate si gita. Ba be ta totolie si gita koasa hiniva tanisa Maqomaqo Hope, si kote kamo si gita pa tinoa meke pa binule. ⁷ Totoso ta pusi sa tie koasa sinea pa tinina, si ta evaṇae na kana koe Tamasa si asa; ura lopu lulia sa sa Tinarae Tanisa, meke lopu boka va tabea sa si Asa. ⁸ Ke sari na tie pu va tabea sa hiniva tanisa kinaleana pa tinidia, si lopu boka va qetua rini sa Tamasa.

⁹ Ba gamu si lopu ta pusi koasa hiniva tanisa sinea pa tinimia, ba ta totolie si gamu koasa hiniva tanisa Maqomaqo Hope, be guana koa koa gamu sa Maqomaqona sa Tamasa. Meke be keke koa gamu si lopu tagoa sa Maqomaqona e Karisito, si lopu te Karisito tugo si asa. ¹⁰ Ba be toa pa korapa bulomia se Karisito, si toa tugo sari na maqomaqo mia, sina ele tava toṇoto koe Tamasa si gamu, ba mate sari na tinimia koa gua koasa sinea. ¹¹ Meke be toa koa gamu sa Maqomaqona Tamasa sapu va toa pulea se Zisu pa minate, si Asa tugo sapu va toa pulea se Karisito pa minate, si kote va toa pulei tugo Sa sari na tinimia pu kaqu mate. Kaqu evaṇia Sa sapu gua asa koasa Maqomaqona Sa sapu koa koa gamu.*

* 8:11 1 Kor 3:16

¹² Ego, kasa tasiqu, mada lopu luli sari hiniva kaleadi pa tinida pude taveti. ¹³ Ura be luli gamu sari na hiniva kaleadi pa tinimia, si kote mate si gamu, ba be va matei gamu sari na tinavete kaleadi koasa niniranira tanisa Maqomaqo Hope, si kote toa si gamu. ¹⁴ Ura arini mo pu ta turana koasa Maqomaqona Tamasa, si arini tugo sari na tuna Tamasa. ¹⁵ Ura sa Maqomaqo Hope sapu ele poni nia Tamasa koa gamu, si lopu va pinausu gamu ke lopu matagutu si gamu. Asa tu vata evanaeni gita tuna Tamasa, meke va boka gita si gita pude zama la koe Tamasa, "Tamaqu, Tamaqu!" gua.**
¹⁶ Sa Maqomaqona Tamasa si somana koa koari na maqomaqoda, pude va sosodea sapu na tuna Tamasa si gita. ¹⁷ Ke koa gua sapu na tuna Tamasa si gita, si kaqu somana tagoi tugo gita sari na tinamanae sapu va nago veko ni Sa pude tadi Nana tie soti, meke kaqu somana tagoi tugo gita koe Karisito saripu ele va nago veko ni Tamasa pude Tanisa. Ura be somana nia gita sa tinasigiti te Karisito, si kaqu somana tagoa tugo gita sa Nana vina lavata.

Sa Vinalavata Vugo Repere

¹⁸ Gilana voleania rau sapu sa tinasigiti tadi gita pa rane ninoroi si lopu garo pude vari padapada la nia koasa vina lavata sapu kote ta poni nia gita. ¹⁹ Doduruna sa vina podaka pu tavetia Tamasa si korapa okoro hola nia meke aqania sa sa totooso pana kaqu vata dogoro ni Sa

* **8:15** Mk 14:36; Qal 4:6 * **8:15** Qal 4:5-7

koasa sari na tuna soti. ²⁰ Ura sa vina podaka si lopu boka va gorevura ia sa nana tinavete, ba lopu pa nana hiniva soti pude gua asa, ba pa hiniva tu te Tamasa. Ba ele koa nana tu sa rinoverove,* ²¹ sapu sari doduru vina podaka pu taveti Tamasa si kote ta rupaha keke rane koasa tinapusi pude muzi si arini, ba kaqu somana koasa tinarupaha tolavaena tadi na tuna Tamasa. ²² Ele gilania gita sapu podalae pukerane meke kamo kamahire sari doduru vina podaka pu taveti Tamasa si va gilagila ia sa tinasigiti, kekenono gua sa tinasigiti tanisa barikaleqe pu tata sa nana totošo podopodo. ²³ Ba lopu sari na vina podaka eke mo pu taveti Tamasa si silava nia sa tinasigiti, ba gita tugo pu ele vagia sa vua kenuna sapu sa Maqomaqo Hope, si somana silava tugo pa korapa buloda, sipu aqa nia gita sa totošo sapu kaqu tava hokoto valeana sa tinapausuda koe Tamasa, meke vagi gita sari tini vaquradi.* ²⁴ Koasa nada rinoverove asa si ele ta harupu si gita, ba be guana ta dogoro sapu gua rovea gita, si lopu na rinoverove si asa. Ura esei si boka rovea sa tinitona sapu ta dogorona? ²⁵ Ba pana rovea gita sa tinitona sapu lopu ta dogorona si kote aqa va nono nia gita si asa. ²⁶ Meke gua tugo sapu sa Maqomaqo Hope si tokani gita pa nada minalohoro, ura lopu gilana valeania gita sapu na sa si garo pude varavara nia gita. Ba sipu varavara gita si sa Maqomaqo Hope tu si varavara tokani gita koari Nana siniño manini saripu lopu boka ta tozi vura pa

* **8:20** Zen 3:17-19 * **8:23** 2 Kor 5:2-4

zinama. ²⁷ Meke sa Tamasa sapu dogorodi saripu koa pa korapa buloda, si gilania sa binalabala tanisa Maqomaqo Hope, ura varavara toka ni sa Maqomaqo Hope sari tie te Karisito, koari na hiniva te Tamasa.

²⁸ Gilania gita sapu sari doduru tin̄itona pu ta evana koa gita si tavetavete ni Tamasa pude valeani saripu tataru nia si Asa, sarini pu tioki Sa pude taveti sari Nana hiniva. ²⁹ Arini pu ele gilana vata kenue i sa Tamasa, si ele vizata vekoi Sa, pude vata evanae guni Sa pa kinehana sa Tuna soti sapu e Zisu, pude na Tuna kenuna koari soku tamatasi. ³⁰ Gua asa ke sarini pu ele vizata vekoi Tamasa tatasana hokara si tioki Sa. Meke arini pu ele tioki Sa si pozani na tie tonoto Sa, meke sarini pu pozani na tie tonoto Sa si va somana ni Sa pa Nana vinalavata.

Sa Tataru te Tamasa pu Mae Gua koe Zisu Karisito

³¹ Ke na sa si boka zama nia gita? Be Tamasa sa nada tinokae, si esei si kaqu boka va kilasa gita? ³² Loke tie! Sina Tamasa tugo si lopu hite ruritia sa Tuna soti, ba va vukivukihi nia Sa pa laeda gita doduru tie. Gua asa ke kaqu poni mokani gita tugo Sa sari doduru likakalae. ³³ Esei kote boka zutui sari na tie ta vizatadi te Tamasa? Ura sa Tamasa tu telena si pozani na tie tonoto si arini. ³⁴ Esei si boka zutu gita? Zisu Karisito sapu ele mate, meke ele turu pule si korapa habotu Nana pa kali mataona sa Tamasa pude varavara tokani gita. ³⁵ Na sa si kote boka vari paqahani gita koasa tataru te Zisu Karisito? Na tinasuna, na minalana,

na ninaqunaqu, na inovia, na hinabahuala, na
vinaripera, na minate? ³⁶ Lokari hokara, ura
guahe sapu ta kubere koasa Kinubekubere Hope:
“Koasa laemu Goi, si tata tava mate nia gami
doduru totošo,
gua tugo rina sipi si gami
pu ta turaṇa va namanama pude tava
mate.”*

³⁷ Ba koari doduru tinasuna gugua hire, si tava
mataqara si gita koe Zisu Karisito pu tataruni
gita! ³⁸ Ura gilana valeania rau sapu loketoṇa
hokara si boka varipaṇahani gita koasa Nana
tataru: lopu na tinoa babe na minate, lopu
sari na mateana babe sari na tomate kaleadi,
meke sari na dia ṇiniraṇira, meke lopu sapu
gua ta evaṇa pa rane ṇinoroi, babe vugo repere,
³⁹ meke lopu saripu koa panaulu pa maṇauru,
babe panapeka pa pepeso. Namu loketoṇa
hokara koari doduru vina podaka pu ta tavetedi
hire, si kaqu boka varipaṇahani gita koasa tataru
te Tamasa, sapu ele ponini gita Sa koe Zisu
Karisito sa nada Baṇara.

9

Tamasa meke sari Nana Tie Ta Vizatadi

¹ Pa qua kineke koe Karisito si zama va
hinokara atu si rau. Sa Maqomaqo Hope meke
sari na qua binalabala, si va sosodea sapu lopu
kokoha si rau. ²⁻³ Sipu balabala i rau sari na
turaṇaqu, na qua butubutu soti, si nomana hola
sa qua tinalotoṇa, meke lopu boka beto ta sigiti
ni rau sarini pa korapa buloqu. Leana hola be ta

* **8:36** Sam 44:22

levei mo si rau koe Tamasa, pude ta paqaha taloa koe Karisito, pude qu hobei sari na turaṇaqu soti.

⁴ Na tie ta vizatadi koe Tamasa si arini, meke ta pozae na tuna soti. Va dogoroni Sa koa rini sa Nana tinolava nedalana. Taveti Sa sari Nana vinariva egoi koa rini, meke ponini Sa koa rini sa Tinarae te Mosese, sa vinahesi pa Zelepade, meke sari na vina tatara.* ⁵ Arini tugo si podo gore mae gua koe Ebarahami, Aisake, meke Zekopi, meke e Karisito si na tutidia tugo rini, sapu podo guana tie pa pepeso. Mani tavahesi sa Tamasa, na Banara tadi doduru tinoni ninae rane ka rane! Emeni.

⁶ Lopu zama si rau, sapu sekea Tamasa sa Nana vina tatara, sina na lopu ari doduru tie Izireli si na tie hinokara te Tamasa. ⁷ Meke lopu ari doduru pu tuti gore mae koe Ebarahami si na tuna Tamasa. Ura zama sa Tamasa koe Ebarahami, “Arini mo pu podo gore mae koe Aisake si ta pozae tutimu hinokara goi,” gua.*

⁸ Gua asa ke saripu pododi pa hiniva tana tie, si lopu poza ni tuna sa Tamasa si arini, ba sari na koburu tu pu pododi pa Nana vina tatara, si ta pozae na tuna hinokara Ebarahami. ⁹ Sina guahe sa vina tatara te Tamasa koe Ebarahami, “Pa totošo guahe pa vuaheni maehe si kote pule mae si Rau, meke kote podoa Sera si keke tuna koreo,” gua.*

¹⁰ Meke lopu asa mo, ba sari karua tuna koreo e Ribeka, si keke mo sa tamadia sapu e Aisake sa tamada. ¹¹⁻¹² Ba sipu lopu ele vizatia tu ri

* ^{9:4} Ekd 9:4 * ^{9:7} Zen 21:12 * ^{9:9} Zen 18:10

karua sapu gua leana babe kaleana, si ele zama la tu koe Ribeka sa Tamasa, “Kaqu nabulu nia sa koburu kenuna sapu mudina,” gua. Zama nia Sa sapu gua asa sipu lopu ele podo tu sari karua tamatasi. Vata evania Tamasa sapu gua asa, pude vizatia si keke ri karua tamatasi, pude boka va gorevura ia Sa sa Nana hiniva. Gua asa ke sa natina sa vinizata te Tamasa si koa gua tu pa Nana tinioko, ba lopu koa ke toña sapu ele tavetia rini.* ¹³ Gua tugo sapu zama nia sa Kinubekubere Hope: “Tataru nia Rau se Zekopi ba etulia Rau se Isoa,” gua sa Tamasa.*

¹⁴ Na sa si kaqu zama nia gita? Lopu tonoto sa Tamasa, gua? Lokari hokara! ¹⁵ Ura zama sa Tamasa koe Mosese, “Arini pu hiva ni Rau si kaqu tataru ni, meke toka ni Rau,” gua.* ¹⁶ Gua asa ke lalae Tamasa mo sapu ari sei si hiva tataru ni na toka ni Sa, ba lopu pa hiniva na tinavete tana tie. ¹⁷ Ura zama gua pule he sa Kinubekubere Hope koe Pero, sa banara pa Izipi: “Va banarigo Rau si goi, pude tavetavete nigo na vata dogoro nia sa Qua niniranira, meke vata gilana nia sa Pozaqu koasa doduruna sa kasia popoa,” gua sa Tamasa.* ¹⁸ Gua asa ke tataru ni meke toka ni Tamasa si arini pu hiva ni Sa, meke va luli ni dia hiniva Sa si arini pu hiva ni Sa pude koa hola pa vina karikari.

Sa Binugoro meke sa Tataru Variva Taleosae te Tamasa

* **9:11-12** Zen 25:23 * **9:13** Mal 1:2-3 * **9:15** Ekd 33:19

* **9:17** Ekd 9:16

19 Keke koa gamu si gina kote zama guahe: “Na vegua ke zutui tu Tamasa sari na tie koari na dia sinea? Ura esei kote boka korona nia sa hiniva te Tamasa?” gua. 20 Esei si agoi ke boka zama hemohemoa sa Tamasa? “Na sa si tavetia Goi?” gua. Agoi si kekenono mo na raro patu ta tavetena pa lima tie, ke lopu leana pude zama la guahe si goi koe Tamasa pu tavetigo, “Na vegua ke tavete guni nau tu Goi sana si rau?” gua.* 21 Sa tie mo pu tavetena sa raro patu, si kaqu tavetia sapu gua hiva nia sa koasa pepeso asa. Boka taveti sa si karua raro; keke si pude tavetavete nia pa totoaso arilaena, meke keke pule si pude tavetavete nia koari na totoaso hoborodi.

22 Kekenono gua puta tugo asa si tavetia sa Tamasa. Hiva va dogoro nia Sa sa Nana binugoro meke sa Nana niniranira, ba aqa va nono ni Sa si arini pu bugoro ni Sa, saripu kote tava kilasa pa tina huara. 23 Meke hiva vata gilana nia tugo Sa sa Nana vina lavata nomana, sapu ele vata gilana valeana nia Sa koa gita, pu tataru ni, meke toka ni Sa; gita pu va namanama gita Sa pude somana pa Nana vina lavata. 24 Ura gita tugo sari na tie pu ele tioko gita sa Tamasa, lopu tale koari na tie Ziu mo, ba koari na tie Zenitailo tugo. 25 Guahe sapu zama nia Tamasa koasa buka Hozea:

“Kote poza ni ‘Qua tinoni’ Rau si arini
 pu pozani lopu na Qua tinoni Rau.
 Meke kote poza ni ‘Na butubutu ta tataruedi’ Rau
 si arini
 pu lopu tataruni Rau.*

26 Meke koasa vasina tugo pu ta tozi nia rini sapu,

* 9:20 Ais 29:16, 45:9 * 9:25 Hoz 2:23

‘Gamu si lopu na Qua tinoni,’ gua,
 si vasina tugo si kaqu ta pozae ‘Na tuna sa
 Tamasa toana’ si arini,” gua.*

²⁷ Meke velavela vura nia Aisea sa guguadi rina
 tie Izireli sapu guahe: “Be vea lopu boka ta nae,
 guana onone pa masa si arini, ba ari ka visavisa
 mo si kote ta harupu,* ²⁸ ura kote lopu sana
 va kilasa hokari sa Baṇara sari na tie pa popoa
 pepeso,” gua si asa. ²⁹ Asa sapu zama nia Aisea
 pukerane, “Be lopu veko hola i sa Baṇara Tadi na
 Qeto Minate si ka visavisa tie pa butubutu Izireli,
 si kote ele ta huara va inete gua tugo pa Sodomu
 meke pa Qomora si gita,” gua.*

Izireli meke sa Inavoso Leana

³⁰ Na sa si kaqu zama nia gita kamahire?
 Ari na tie Zenitailo saripu lopu hite hata ia sa
 tinonoto, si ele vagia rini sa tinonoto koe Tamasa
 pa dia rinanerane. ³¹ Ba sari na tie Izireli pu
 podekia pude vagia sa tinonoto koasa linulina
 sa Tinarae te Mosese, si lopu boka tu. ³² Na
 vegua? Ura lopu hata ia rini pa dia rinanerane,
 ba pa korapa dia tinavete leadi, saripu taveti
 rini pa kinopuna sa Tinarae te Mosese. Gua asa
 ke ta tubarae koasa “Patu” meke hoqa si arini.
³³ Asa sapu zama nia sa Kinubekubere Hope,
 sapu guahe:

“Dotu, vekoa Rau pa Zaione si keke patu*,
 sapu kote va tubarae i sari na tie,
 na patu sapu kote va hoqai si arini.

* **9:26** Hoz 1:10 * **9:27** Ais 10:22-23 * **9:29** Ais 1:9 * **9:33**
 E Zisu si na patu pa Zaione.

Ba arini pu ra_̄nea si Asa
si lopu kote tava kurekure,” gua.*

10

¹ Kasa tasiqu, hiva sisigiti nia rau si pude ta harupu sari tie Izireli. Asa sa qua vinaravara koe Tamasa. ² Arau boka va sosodea sapu podeke sisigitia rini pude lulia sa Tamasa, ba sa dia pinodepodekae si lopu turu koasa ginilagilana hinokarana. ³ Lopu gilania rini sa sirana, gua meke va to_̄noti Tamasa sari na tie. Podekia rini pude va to_̄noto puleni teledia koari na dia tinavete soti. Gua asa ke va tabea rini sa siranana gua meke va to_̄noti Tamasa sari na tie. ⁴ Ura e Karisito sina vina hokotona meke na vina gorevurana sa Tinarae te Mosese, pude sari doduru tie pu va hinokaria si Asa si kote tava to_̄noto koe Tamasa.

Tadi Doduru Tie mo sa Tinaharupu

⁵ Kuberia Mosese sa gugwana sa tinonoto sapu podekia rina tie pude vagia koasa vina tabena sa Tinarae sapu guahe: “Asa sapu va tabei sari na zinama tanisa Tinarae te Tamasa si kote toani tugo sa,” gua.* ⁶ Ba sa Kinubekubere Hope si tozia sa tinonoto sapu mae guana koasa rina_̄nerane sapu gua tu he: “Mu lopu zama guahe pa bulomu, esei si kote sage la pa Ma_̄auru?”

* 9:33 Ais 28:16 * 10:5 Liv 18:5

(pude turana gore mae nia se Karisito*, si gunia sa.)* ⁷ Meke lopu kaqu nanasa guni pule nigo he telemu si goi: “Esei si kote gore la pa Hedisi, sa vasina koa sari na maqomaqodi rina tie matedi?” (pude la turana sage pule mae nia se Karisito, si gunia sa.) ⁸ Gua mo he sapu zama nia sa Kinubekubere Hope: “Sa zinama te Tamasa si koa nana mo koa goi. Koa nana mo pa korapa nuzumu meke pa bulomu.” Asa tu sa inavoso tanisa rinañerane sapu tarae nia gami. ⁹ Be helahelae vura nia goi pa nuzumu sapu e Zisu sina Bañara, meke va hinokaria goi pa bulomu, sapu va toa pulea Tamasa se Zisu pa minate, gua, si kaqu ta harupu si agoi. ¹⁰ Ura totooso va hinokara ia gita se Zisu pa korapa buloda, si ta pozae na tie toñoto si gita koe Tamasa. Meke sipu helahelae vura nia gita sa nada vina hinokara, si ta harupu si gita. ¹¹ Gua mo sapu zama nia sa Kinubekubere Hope: “Asa sapu rane a si Asa, si lopu kaqu tava kurekure,” gua.* ¹² Ura kekenoño mo sari doduru tie koasa tinaharupu te Tamasa, be na tie Ziu babe na tie Zenitailo, sina kekeke mo sa Tamasa, na Bañara tadi doduru tie, meke poni beto ni minana lavata mo Sa sari doduru pu rane a si Asa. ¹³ Gua tugo sapu zama nia

* **10:6** Sa tinaharupu te Karisito si boka vagia gita kamahire koasa rinañerane. Lopu ta hivae pude sage la pa Mañauru pude turana vagia, si Asa sina balabala ia gita sapu lopu ele mae si Asa. Meke lopu ta hivae tugo pude gore la pa Hedisi^d si gita sa vasina pu koa sari na maqomaqodi rina tie matedi pa kasia popoa, pude hata ia sina balabala ia gita sapu lopu hite turu pule pa minate si Asa. * **10:6** Diut 30:12-14 * **10:11** Ais 28:16

sa Kinubekubere Hope, sapu zama guahe: “Sari doduru pu tepa ia sa tinokae koasa pozana sa Baṇara, si kaqu ta harupu,” gua.*

¹⁴ Ba vegua meke boka tepa tinokae si arini, be lopu ele va hinokaria rini si Asa? Vegua meke kote boka va hinokaria rini be lopu avoso nia rini si Asa? Vegua meke boka avoso nia rini, be loke tie si tarae nia koa rini? ¹⁵ Ba vegua meke boka ta tarae vura sa inavosona Sa, be lopu ta garunu vura sari tie pude tozia sa Inavosona Sa? Ura zama guahe sa Kinubekubere Hope: “Nake tolavaedi sari nenedi ri na tie pu paleke mae nia sa Inavoso Leana!” gua.*

¹⁶ Ba lopu doduru tie si va hinokaria sa Inavoso Leana. Zama se Aisea: “Baṇara, esei ele va hinokaria sa nada inavoso?” gua.* ¹⁷ Ke sa rinanerane si kamo mae pana avosia gita sa Inavoso Leana, meke sa Inavoso Leana si mae gua pa korapa tinozi vurana e Karisito.

¹⁸ Ba nanasa si rau, hinokara sapu lopu ele avosia rina tie Ziu sa Inavoso Leana?

Lokari, ele avosia dia mo,

sina zama guahe sa Kinubekubere Hope:

“Sa dia tinarae si ene vari likohae nia sa kasia popoa,

meke sari na dia zinama si kamo sa hukihukirina sa popoa pepeso,” gua.*

¹⁹ Ego, maqu nanasa pule guahe: Vegua, lopu gilania tu rina tie Izireli sia? Lokari, ele avosia dia mo ba lopu va hinokaria rini. Ura e Mosese

* **10:13** Zol 2:32 * **10:15** Ais 52:7 * **10:16** Ais 53:1 * **10:18** Sam 19:4

tu sa tie kekenu sapu tozia, gua sapu zama nia Tamasa koarini sapu guahe:

“Kote va kono gamu Rau koari na butubutu
pu lopu vizati Rau,
meke kote va bugoro gamu Rau si gamu na
Qua tie soti

koari na butubutu* duviduvilidi pu ran̄e Au
si Rau,” gua si Asa.* ²⁰ Meke zama va
mataqara nia Aisea sapu guahe:

“Ta dogoro si Rau koa rini pu lopu hata Au,
meke vata dogoro pule nau si Rau
koa rini pu lopu nanasa Nau,” gua.* ²¹ Ba
zama guahe sa Tamasa koasa guguali rina
tie Izireli:

“Doduru rane mo si hiva repaha lani Rau sari
limaqu pude va kekere pulei Rau sari na
tie va guguedi, na va karikaridi,” gua.*

11

Sa Tataru te Tamasa koari na Tie Izireli

¹ Nanasa guahe si rau: Vegua, kilu pani Tamasa
sari Nana tie soti? Lokari hokara! Arau ba
na tie Izireli mo, sapu tuti gore mae guaqu
koe Ebarahami, koasa butubutu te Benisimane.*

² Ele vizati tu Tamasa sari na tie Izireli, pude
Nana tie soti pa pinodalaena hokara. Meke
lopu etulu pani Sa sarini. Gilania mia mo
gamu sapu gua zama nia sa Kinubekubere Hope,
totoso varavara lani Ilaiza sari na tie Izireli koe
Tamasa: ³ “Banara! Ele va matei rini sari Mua

* **10:19** Sari na tie Zenitailo.

* **10:19** Diut 32:21

* **10:20**

Ais 65:1

* **10:21** Ais 65:2

* **11:1** Pil 3:5

poropita, meke huari rini sari Mua hope, meke arau mo si koa hola. Meke kamahire si hiva va mate au tugo rini,” gua si asa.* ⁴ Ba sa gua sa inolana te Tamasa koa sa? “Ari ka zuapa tina tie si korapa koadia pa Qua kinopu, saripu lopu vahesia se Beolo, sa beku,” gua sa Tamasa.*

⁵ Meke kekenono gua tugo pa rane ninoroi; sapu ari ka visavisa mo sapu ta vizatadi koasa tataru variharupi te Tamasa si koa hola. ⁶ Ke be guana sa vinizavizata te Tamasa si koa gua koasa Nana tataru variharupi, si lopu pa tinavete tadi tie sia. Ura be koari na tinavete saripu taveti rina tie si ta vizata nia rini koe Tamasa, si lopu ta vizata koa gua koasa Nana tataru variharupi si arini.

⁷ Ke vea mo? Gua sapu hata sisigitia ri na tie Izireli si lopu vagia rini, ba ari ka visavisa mo ta vizatadi mo si vagia sa tinaharupu. Sari kasa doduru pule si tava nuli pude di lopu avosia sa tinioko te Tamasa. ⁸ Gua tugo sapu zama nia sa Kinubekubere Hope sapu guahe:

“Ele poni Tamasa si keke maqomaqo pupuhu,
ke sari mata dia si lopu boka dodogorae
meke sari taliña dia si lopu boka avavosae,
kamo pa rane ninoroi.”* ⁹ Zama se Devita:
“Madi ta evanae guana sipata sari na dia in-
evana,
madi hoqa na tava kilasa gedi si arini!

¹⁰ Madi tava tutaka sari na matadi,
pude di lopu dodogorae,
madi ene kokokopo mo ninae rane
guana tie pu mamati pa dia tinasuna,” gua.

* **11:3** 1 Ban 19:10,14 * **11:4** 1 Ban 19:18 * **11:8** Diut 29:4;
Ais 29:10 * **11:9** Sam 69:22-23

¹¹ Ke nanasa guahe si rau: Totoso hoqa sari na tie Ziu si hoqa ta inete ni sarini? Lokari hokara! Sipu hoqa pa sinea sarini, si mae koari na tie Zenitailo sa tinaharupu, pude va konoï sari na tie Ziu, gua. ¹² Sa sinea tadi na tie Ziu si vata evania sa minana lavata pa kasia popoa. Sa minana hie si vagia rina tie Zenitailo, sina lopu va hinokaria rina tie Ziu se Zisu, ke kote nomana hola tu sa minana, pana tava somana beto sari na tie Ziu pu ta vizatadi.

Sa Tinaharupu Tadi na Tie Zenitailo

¹³ Kamahire si zama atu si rau koa gamu kasa na tie Zenitailo: Koa gua sapu na apositolo si rau koa gamu na tie Zenitailo, si va arilaena hola ia rau sa qua tinavete, ¹⁴ pude va konoï gedi sari na turanaqu soti, pude boka ta harupu sari kaiqa arini. ¹⁵ Ura sipu kilui Tamasa sari na tie Ziu, si va evanae ni Nana baere Sa sari na tinoni pa kasia popoa. Ba pana tava kekere pule mae koe Tamasa sari na tie Ziu, si hokara kote guana tiqe toa puledi pa minate si arini.

¹⁶ Be sa sinika bereti kekenu si ta vala koe Tamasa, si te Tamasa beto mo sa doduruna, meke be sari na dadagana sa huda si ta vala koe Tamasa si tanisa tugo sari na lelaña.* ¹⁷ Ba kaiqa lelañana sa huda olive si ta moku palae, meke ta soto hobe vala si gamu na tie Zenitailo, na guana lelaña olive pinomodi si gamu. Kamahire si tava ninira si gamu koari na tinoa maqomaqo tadi na

* **11:16** Sapu gunia hie si sari na tie Ziu meke sari na tie Zenitailo: Pana somana sari na tie Zenitailo koari na tie Ziu pu ranea se Zisu si kaqu tava madi beto sarini koe Tamasa.

tie Ziu. ¹⁸ Gua asa, ke mi lopu dono va gorei gamu saripu guana lelana huda ta moku palaedi. Ura mi tumae nia si hie: Loke mia vinaritokae koari na dadaga, ba ari na dadaga mo si tokani gamu.

¹⁹ Ba kote zama si gamu, “Uve, ba sari na lelana si ta moku palae pude veko poni gami lolomo si gami,” gua. ²⁰ Hinokara sapu ta moku palae si arini sina loke dia vina hinokara, ba gamu si soto vasina, sina va hinokara. Ba mi lopu vahesi puleni gamu, ba mi koa va balau. ²¹ Be lopu ruriti Tamasa sari na tie Ziu, sari na lelana hinokaradi sa huda olive, si vegua, kote ruriti gamu Tamasa be lopu va hinokara si gamu? ²² Mi balabala ia sa tataru meke sa vina kilasa te Tamasa: Va kilasi Sa si arini pu hoqa meke lopu va hinokara, ba tataru ni gamu Sa, be koa nono la si gamu koasa Nana tataru. Ba be lopu gua, si kote ta koku palae tugo koe Tamasa si gamu. ²³ Meke be kekere meke va hinokara sari na tie Ziu, si kote tava soto pule dia mo vasina pu koa kenudi si arini, ura sa Tamasa mo tagoa sa niniranira pude tava soto pule lani koasa huda. ²⁴ Ura, be gamu si ta koku vagi koasa keke huda olive pinomona meke tava soto la koasa huda olive ta letena gua sapu lopu hoke ta tavete, si lopu tasuna koasa Tamasa pude vagi puleni sari tie Ziu, sari lelana hinokaradi, meke va soto pule lani pa dia kokoana soti.

²⁵ Kasa tasiqu, hiva va gilanani gamu rau sa hinokara tomena hie pude lopu vahesi puleni gamu. Sa vina karikari tadi na tie Izireli si lopu kaqu koa hola ninae rane, ba kaqu koa paki mo si asa, osolae kamo sa totoaso sapu kote somana

beto mae sari na tie Zenitailo ta vizatadi koe Tamasa. ²⁶ Ke pa totoaso asa doduru tie Izireli si kote ta harupu. Gua puta tugo sapu zama nia sa Kinubekubere Hope:

“Sa Hinarupu si kote mae gua pa Zaione*, meke kote vagi pania sa kinaleana tadi na tie pa tutina e Zekopi.*

²⁷ Meke hie sa Qua vinariva egoi koa rini, pana taleoso ni Rau sari doduru dia sinea.”*

²⁸ Koa gua sapu kilua rina tie Ziu sa Inavoso Leana, ke ta evanae kana te Tamasa si arini, pa vinaleana mia gamu na tie Zenitailo. Ba koa gua sapu ele vizati tu Tamasa sari tiatamadia, ke ta tataruedi koe Tamasa si arini. ²⁹ Ura sa vinizata meke sari vinariponi te Tamasa si lopu hite boka ta hobe. ³⁰ Kekenono gua tugo gamu na tie Zenitailo, sapu lopu hite va tabea gamu sa Tamasa pa totoaso ele hola. Ba kamahire si tagoa gamu sa Nana tataru variva taleosae, sina lopu va tabea ri na tie Ziu si Asa. ³¹ Ke kamahire si ari tie Ziu si lopu va tabe pude di boka vagia tugo sa tataru variva taleosae te Tamasa gugua gamu pu ele vagia sa tataru variva taleosae Tanisa. ³² Ura ele vata pusi betoi Tamasa sari doduru tie koasa dia vina karikari, pude mani vata dogoro nia Sa koari doduru sa Nana tataru variva taleosae.

Mani Tavahesi sa Tamasa

³³ Sa Nana tataru variva taleosae ravutuna e Tamasa si lopu boka ta nana kamo, meke sa Nana ginilagilana lohina^d, na tinumatumae si

* **11:26** E Zisu si na Hinarupu pu mae gua pa Zerusalem.

* **11:26** Ais 59:20-21 * **11:27** Ais 27:9

lohi hola. Loke tie boka tumae nia sa guguaana sa Nana vinaripitui, meke sari Nana tinavete.*

³⁴ Gua sapu zama nia sa Kinubekubere Hope: “Vea, esei ele tumae nia sa binalabala te Zihova?

Babe esei ele totoli nia si Asa?*

³⁵ Esei ele hite ponía keke tinítona sa Tamasa pude kaqu poni hobeá Sa si asa?”*

³⁶ Ura Asa mo taveti meke kopu ni sari doduru vinapodaka, meke Tanisa tugo si arini.

Mani tavahesi sa Tamasa ninae rane ka rane! Emeni.*

12

Sa Tinoa pa Ninabuluna sa Tamasa

¹ Ego, kasa tasiqú, koasa tataru variva taleosae te Tamasa koa gita, si tepa zonazona gamu rau, pude vala i koe Tamasa sari na mia tinoa, guana vina vukivukihi toana. Mamu va madi i pa ninabuluna Sa sari na mia tinoa, pude va qetua sa Tamasa. Asa sa mia vinahesi hinokara koa Sa pa korapa bulomia. ² Mi lopu va malumi sari na mia tinoa, pude keha luli sari na hahanana kaleadi tanisa kasia popoa. Ba mi va malumi sari na mia binalabala, pude ta hobe beto koe Tamasa, pude boka gilania gamu sa hiniva te Tamasa, sapu leana na tonoto, meke pude va qetua si Asa.

³ Ba koasa Nana tataru variharupi, sapu poni nau Tamasa koa rau, si zama atu guahe si rau koa gamu hopeke tie: Mu lopu dono va sage pule nigo sapu na tie arilaemu si goi, ba mu balabala

* **11:33** Ais 55:8 * **11:34** Ais 40:13 * **11:35** Zob 41:11

* **11:36** 1 Kor 8:6

pule nigo gua sapu garomu. Mu va pepekae pule nigo pa mua binalabala, mamu va garogaroa sa mua tinoa, koasa padana sa rinañerane sapu poni nigo sa Tamasa. ⁴ Ura sari hopeke tinida gita, si soku kukukurudi, meke sari doduru kukukuru tini hire si votivotikaedi sari na dia tinavete.* ⁵ Gua tugo asa si gita, ke sokuda si gita pu va hinokaria se Zisu, ba soto varigarae mo pa kekeke tini koe Zisu Karisito. Hopeke gita pu ta varigarae si keke kukuruna sa tini asa. ⁶ Hopeke gita si ta poni votivotiki vinariponi, luli gua koasa tataru variharupi sapu ta poni nia gita koe Tamasa. Be sa vinariponi tanisa keke tie si pude tozia sa Inavoso te Tamasa, si mani tavetavete nia luli gua koasa padana sa nana rinañerane.* ⁷ Be guana sa vinariponi si pude varitokae, si mani varitokae; ba be variva tumatumaie gua, si mani variva tumatumaie. ⁸ Meke pude variva ninirae i gua, si mani variva ninirae i. Asa sapu variponi, si mani variponi va sokusoku tugo; be pude tuturana gua, si mani tuturana va nalinali; be va sare gua, si mani va sare pa qinetuqetu si asa.

⁹ Mi tataru va hinokara ni sari na tie. Mi kukiti nia sa kinaleana, mamu tuqe va nabua sapu leana. ¹⁰ Ke mi koa vari tatarue doduru toso, guana tamatasi soti koe Karisito, mamu qetuqetu pude variva pamani. ¹¹ Mu lopu koa gua na tie hakohako, ba mi koa nalinali nia sa ninabuluna sa Banara pa doduru bulomia. ¹² Mi koa qetu nia gua sapu ranea gamu sapu kote ta evana, mamu aqa va nono koari na mia tinasuna, mamu lopu

* **12:4** 1 Kor 12:12 * **12:6** 1 Kor 12:4-11

makudo varavara doduru totoſo. ¹³ Mi poni sari na tasimia koe Karisito pu ehaka nia sa tinokae, mi va kamo getugetui pa mia vetu sari na tie.

¹⁴ Mi varavara lani koe Tamasa pude mana ni si arini pu nonoſala gamu; uve, tepa ia sa Tamasa pude mana ni, ba lopu pude leve ni si arini.* ¹⁵ Mi qetu ſomanae koa rini pu qetu, mamu kabo turani si arini pu kabo.

¹⁶ Mi koa varibulei pa vari korapa mia, mi lopu vahesi puleni gamu, ba koa baere turani sari tie kumakumana. Mi lopu dono va sage puleni gamu.*

¹⁷ Mu lopu hobe nia kinaleana sa kinaleana, ba mi tavetia ſapu gua leana koari doduru tie.

¹⁸ Gua ſapu bokai gamu pa mia kalina, si podekia pude mi koa bule koari doduru tie. ¹⁹ Kasa qua baere, mi lopu hobe nia kinaleana sa kinaleana, ba mi veko la nia koe Tamasa ſapu gua aſa pude lipua, ſina zama guahe sa Kinubekubere Hope: “Arau si kote tubeſi; kote hobei Rau si arini,” gua sa Tamasa.* ²⁰ Ba mi tavetia ſapu gua zama nia sa Kinubekubere Hope: “Be oſia sa mua kana, si mamu ponſa, babe memeha sa, si mamu va napoa, ura be tavete guahe si gamu, si kote pulepaho sa mia kana.”* ²¹ Mu lopu va malumia sa kinaleana pude va kilasigo; ba mamu va kilasa nia lineana sa kinaleana.

13

Sa Nada Vinatabe koaſa Qinavuna

* **12:14** Mt 5:44; Lk 6:28 * **12:16** TTA 3:7 * **12:19** Diut 32:35

* **12:20** TTA 25:21-22

¹ Gamu doduru si mi va tabei sari na tie pu tago niniranira pa qinavuna. Ura be lopu tava malumu koe Tamasa si arini, si lopu boka tagoa rini sa niniranira. Sina sari doduru tie pu tagoa sa niniranira asa, si ta vizatadi koe Tamasa.

² Sa tie sapu lopu va tabea sa tinarae tadi na qinavuna, si va karia tugo sa sa Tamasa sapu vizatadi si arini, meke sa tie sapu tavete gua asa si tepa ia sa vina kilasa pa nana tinoa soti koari na qinavuna. ³ Sari na tie pu tavete va toŋoto si loke dia minatagutu koari na qinavuna. Ba sarini pu tavete va sea mo si matagutu. Be lopu hiva koa matamatagutu si gamu, si mi tavete va toŋoto mo, pude tava lavata mia koari na qinavuna.

⁴ Ura na nabulu mo te Tamasa si arini pude tokani gamu. Ba be tavete va sea si gamu si mi matagutu ni. Ura sari na qinavuna si ari dia niniranira pude va kilasa gamu. Arini si na nabulu te Tamasa, pude vata evania sa vina kilasa te Tamasa koa rini pu tavete va sea.

⁵ Gua asa, ke mi va tabei sari na tinarae tadi na qinavuna, lopu koa gua koasa minatagutuna mo sa vina kilasa, ba gua tu sapu tozini gamu sa bulomia pude taveti.

⁶ Gua asa ke tabara takisi si gamu, sina sarini pu tuŋei sari na niniranira pa qinavuna, si na tie tavetavete mo te Tamasa, pu kopu totoko nia sa dia tinavete.* ⁷ Ke mi tabari sari doduru mia takisi saripu tepai rini; sari doduru mia takisi soti telemia, meke saripu tana mia tinagotago; mi pamaŋa ni na va lavati sari doduru tie tavetavete sara.

* 13:6 Mt 22:21; Mk 12:17; Lk 20:25

Tinavete Variva Tokae pa Hopeke Tie

⁸ Mu lopu veko gale koa ke tie pa doduru ginugua, ba sapu kaqu tavetia goi, si mamu lopu makudo koa vari tatarue mo. Ke asa sapu tataru, si ele va tabe betoa mo sa sa Tinarae te Tamasa.

⁹ Sari tinarae hire: “Meke mu barabarata, meke mu variva mate, meke mu hiko, meke mu okoro nia sa likakalae tanisa votiki tie,” gua; sari doduru arini, meke kaiqa pule si ta varigarae mo pa keke tinarae, sapu guahe: “Mu tataru nia sa turanamu, gua sapu tataru pule nigo si agoi,” gua.* ¹⁰ Ura asa sapu tataru ni sari doduru tie, si lopu tavete va kaleana si asa koa rini. Ke asa sapu tataru, si ele va tabea mo sa doduruna sa Tinarae te Tamasa.

¹¹ Ego, mi tavete gua asa, sina gilania mia mo gamu sa toতোসা kamahire. Ele kamo mo sa toতোসা, ke mi vañunu koari na mia pinuta. Ura sa nada tinaharupu si tata hola kamahire, hola nia toতোসনা sipu podalae va hinokara si gita.

¹² Ele tata hola taloa sa boni, meke tata mae sa rane. Mada beto taveti sari na hahanana tanisa hinuporo, mada va namanama varipera ni sari na tinitonā varipera tanisa kalalasa. ¹³ Mada ene pa hahanana toñoto, gua rina tie pu ene pa kalalasana sa rane; lopu na ninaponapo va viviri, meke na vinarigara tie pa vinarivosa, lopu pa vinari riqihī, babe na hahanana kaleadi, lopu pa vinaripera, babe na kinonokono. ¹⁴ Ba mi pokopoko nia sa kinehana e Zisu Karisito. Mi lopu balabala hata i pude luli meke va tabei sari hiniva kaleadi pa tinimia.

* **13:9** Ekd 20:13-15,17; Diut 5:17-19,21; Liv 19:18

14

Mu Lopu Zutua sa Tasimu

¹ Mi baeria sa tie sapu malohoro pa nana rina^unera^u, ba lopu zutua babe varitokei nia koari nana binalabala soti.* ² Koa keke tie si kote leana mo pa nana rina^unera^u si pude henai sari doduru ginani, ba sa tie sapu malohoro nana rina^unera^u si tale hena ginani elelo na vua huda mo. ³ Meke sa tie sapu boka henai sari doduru ginani si lopu kaqu do^uno va go^urea sa sa tie sapu lopu boka, meke sa tie sapu lopu henai sari doduru ginani, ba lopu kaqu zutua si asa sapu boka henai sari doduru ginani, sina lopu etulia Tamasa si asa. ⁴ Esei si agoi pude zutua sa nabulu tana votiki tie? Sa nana palabatu soti mo telena si kaqu vizatia, sapu be to^uoto babe sea si asa, meke kote qetu nia tugo Tamasa, sina Asa tu kote boka toka nia pude tavete valeana si asa.

⁵ Pa binalabala tanisa keke tie si arilaena hola si keke rane, hola ni sari kaiqa rane pule; ba pa binalabala tanisa keke tie pule, si keke^uno^uno^u beto mo sari doduru rane. Ego, hopeke tie si mani vizata valeania mo sapu gua to^uoto pa nana binalabala. ⁶ Asa sapu va madia si keke rane si va madi nia sa koasa Ba^una^ura, meke asa sapu boka henai sari doduru ginani si va lavatia sa sa Ba^una^ura, sina zama leana ni sa si arini koe Tamasa. Asa sapu madi ni sari kaiqa ginani, si va madi ni sa koasa Ba^una^ura, meke zama leana ni tugo sa pa nana vinaravara. ⁷ Ura loke tie gita si toa babe mate eke telena pude va qetu pule nia. ⁸ Be toa si gita, si toa pude va lavatia sa

* 14:1 Kol 2:16

Banara; meke be mate si gita, si mate pude va lavatia tugo sa Banara. Ke be toa ba be mate si gita, ba tanisa Tamasa tugo si gita. ⁹ Ura Karisito si mate meke toa pule, pude na Banara tadi pu toadi meke matedi. ¹⁰ Ke, sapu agoi na vegua ke zutua goi sa tasimu koe Karisito? Babe na vegua ke dono va gorea goi sa tasimu? Ura gita doduru mo si kote turu pa kenuna sa Tamasa, pude ta pitu koa Sa.* ¹¹ Ura guahe sapu zama nia sa Kinubekubere Hope:

“Na Tamasa toaqu si Rau,

ke tozi va hinokarani gamu Rau,

sapu kote kokotuŋu pa kenuqu Rau sari doduru tie,

meke kote helahelae Nau rini sapu Arau sa

Tamasa,” gua.*

¹² Ke hopeke gita doduru si kote tozi vura ni koa sa Tamasa pa rane vinaripitui sari hopeke nada tinavete.

Mu Lopu Turana Va Sea ia si Keke Tasimu

¹³ Ego, mada lopu varivari zutui si gita. Mada balabala ia pude lopu tavetia si keketona sapu boka vata tubarae ia pa sinea si keke tasida koe Karisito. ¹⁴ Pa korapa qua tinoa koe Karisito sa Banara, si gilania rau sapu loke ginani si hopena pude hena ia. Ba be va hinokaria ke tie sapu hopena si keke ginani gua, si ta evanae hopena tugo koasa si asa. ¹⁵ Be guana nonoala ia goi sa rinaŋerane tanisa tasimu koasa ginani sapu hena ia goi, si lopu luli valeania goi sa hahanana tataru. Mu lopu novala nia pa ginugua ginani

* **14:10** 2 Kor 5:10 * **14:11** Ais 45:23

goi sa rinanerane tanisa tasimu sapu ele mate hobeia Karisito. ¹⁶ Mu lopu taveti sari na tinavete sapu kote boka zama va kaleanani gamu ri na tie si gamu na tie te Karisito. ¹⁷ Ura sa Butubutu Banara te Tamasa si lopu koa gua pa ginugua ginani na napo; ba na tinonoto, na binule, meke na qinetuqetu tu pa korapana sa Maqomaqo Hope. ¹⁸ Ke asa sapu nabulu nia se Karisito pa sirana asa, si va qetua sa sa Tamasa, meke tava sosode tugo koari na tie, sapu leana si tavetia sa.

¹⁹ Gua asa, ke mada podeke sisigitia pude koa bule koari na tie doduru toto. Mada koa varivari tokae na variva ninirai. ²⁰ Mani lopu ta nonoala pa ginugua ginani sa tinavete te Tamasa. Doduru ginani si leadi beto mo pude henai. Ba lopu leana si pude hena ia si keke ginani sapu boka va hoqai pa sinea sari kaiqa tie. ²¹ Sapu tonoto pude tavetia si pude lopu hena miti, na napo vaeni, babe evani kaiqa toa pule sapu boka va hoqai sa tasimu.

²² Mamu kopu nia mo sapu gua va hinokaria goi pa varikorapamu goi meke sa Tamasa. Ba tamanae sa tie sapu lopu zutu pule nia toto tavetia sa sapu gua tonoto pa nana binalabala.

²³ Ba be nunala sa tie toto henahena si asa, si zutu pule nia mo si asa, ura lopu soto pa rinanerane sapu gua evania sa, meke sa tinitona sapu lopu ta tavete pa rinanerane, si na sinea tugo si asa.

15

Sa Tinoa pude Va Qetui sari Votiki Tie

¹ Gita pu n̄nira pa rinaṇeraṇe, si mada paleke toka ni pinaleke mamata saripu malohoro pa rinaṇeraṇe. Ba lopu pude va qetu puleni gita. ² Ba mada hopeke tavetia sapu gua leana, pude va qetui sari na tasida pude va n̄nira sagei pa rinaṇeraṇe si arini. ³ Sina e Karisito ba lopu va qetu pule nia telena, ba gua tugo sapu zama nia sa Kinubekubere Hope: “Sipu zama va kaneanigo rini si zama va kaneanau tugo rini si Arau,” gua.* ⁴ Sari doduru t̄nitoṇa saripu ele ta kubere koasa Kinubekubere Hope, si pude va tumatumae gita, pude mada soto va nabu meke tava n̄nira si gita koari na vinatataru. ⁵ Sa Tamasa sapu poni gita sa sinoto va nabu meke sa n̄niraṇira, si mani va boka gamu pude mi koā keke mo pa mia binalabala meke tinoa, pude lulia sa kinehana e Zisu Karisito; ⁶ pude mi keke gua vahesia gamu doduru sa Tamasa, sa Tamana sa nada Baṇara Zisu Karisito.

Sa Inavoso Leana koari na Tie Zenitailo

⁷ Mi koa vari hapahapai si gamu gua sapu vagi gamu Karisito si gamu pude mani tavahesi sa Tamasa. ⁸ Ura tozini gamu rau sapu nabulu ni Karisito sari na tie Ziu, pude vata dogoro nia sapu hinokara sa vina tatara te Tamasa koari na tiatamadia rini. ⁹ Gua asa pude va bokai tugo Sa sari na tie Zenitailo, pude vahesia sa Tamasa koa gua koasa Nana tataru variva taleosae koarini, gua sapu zama nia sa Kinubekubere Hope: “Gua asa ke kote vahesigo rau pa vari korapadi ri na tie Zenitailo;

* 15:3 Sam 69:9

kote kera vahesia rau sa Pozamu.”*

¹⁰ Meke gua pule he si ta zamae:

“Gamu na tie Zenitailo,
si mi koa qetuqetu somanae koari na tie ta
vizatadi te Tamasa,” gua.*

¹¹ Meke gua pule he:

“Mi vahesia sa Baṇara, gamu doduru tie Zeni-
tailo,
mi kera vahesia, gamu doduru tinoni.”*

¹² Meke e Aisea ba zama gua tugo he:

“Sa Karoso te Zese si kote tuvulu vura,
kote turu sage si Asa pude baṇara ni sari tie
Zenitailo,
meke kote raṇea ari na Zenitailo si Asa,”
gua.*

¹³ Mani va siṇi ni gamu qinetuqetu meke
binule, sa Tamasa koari na mia rinaṇerane koa
Sa, pude mi raṇe valeania pa korapa ṇiniraṇira
tanisa Maqomaqo Hope sapu kote gorevura sari
Nana vinatatara.

Guguana sapu Zama Va Mataqara nia Paula

¹⁴ Kasa tasiq, gilana valeania rau sapu siṇi
nia na lineana sa mia tinavete koari na tie, meke
tagoi gamu sari tinumatumae, pude boka variva
tumatumae si gamu. ¹⁵ Ba mataqara si rau pude
kubere atu koa gamu, pude va balabala puleni
gamu si kaiqa ginugua, sina ele garunau Tamasa
si rau pa Nana tataru variharupi ¹⁶ pude qu
nabulu nia se Zisu Karisito koari na tie Zenitailo.
Tavetavete guana hiam si rau, pude tarae nia

* **15:9** 2 Samuela 22:50; Sam 18:49

* **15:10** Diut 32:43

* **15:11** Sam 117:1 * **15:12** Ais 11:10

sa Inavoso Leana te Tamasa, pude di ta evañae na vinariponi pu variva qetu koe Tamasa sari na tie Zenitailo, pu ele tava madidi koa Sa, pa ñinirañira tanisa Maqomago Hope. ¹⁷ Gua ke koasa qua sinoto va nabu koe Zisu Karisito, si koa qetu nia rau sa qua tinavete pude nabulu nia sa Tamasa. ¹⁸ Lopu kote zama nia rau keketona ba gua mo sapu evañia Zisu Karisito koa rau, pude turana lani sari na tie Zenitailo pude va tabea sa Tamasa. Ele evañia Karisito sapu gua asa koari na qua zinama na tinavete, ¹⁹ koasa ñinirañira tadi na tinavete variva magasadi na vina gilagila nomadi, meke koasa ñinirañira tanisa Maqomagona Tamasa. Ke koari doduru qua inene podalae pa Zerusalema, meke kamoa pa Ilirikamu, si tarae beto nia rau sa Inavoso Leana koasa gugwana e Zisu Karisito. ²⁰ Sa qua hiniva nomana si pude tarae nia sa Inavoso Leana koari na vasidi sapu lopu ele ta avoso sa pozana e Karisito, pude qu lopu guana la kuri vetu koasa sinokirae sapu ele podalae nia rina votiki tie. ²¹ Gua sapu zama nia sa Kinubekubere Hope sapu zama gwahe:

“Arini pu lopu ta tozi nia sa gugwana Sa si kote dogoria rini,
meke sarini pu lopu ele avoso nia si kote gilancia.”*

Sa Minizi te Paula pude La pa Roma

²² Gua mo asa ke ta hukata si arau soku totozo pude atu koa gamu.* ²³ Ba kamahire si ele va hokoti rau sari na qua tinavete koari na vasidi

* 15:21 Ais 52:15 * 15:22 Rom 1:13

hire, meke sina hoke mizimizi atu si rau koa gamu koari soku vuaheni ele hola pude atu dogoro gamu, gua; ²⁴ ke balabala ia rau si pude atu tutuvu gamu koasa qua inene la pa Sipeini, pude qu boka ta tokae koa gamu koasa qua inene la vasina, pana ele beto atu koa getugetu paki koa gamu si rau. ²⁵ Ba kamahire si korapa hebala la pa Zerusalema si rau, pude varitokae paki si rau koari na tie te Tamasa vasina.* ²⁶ Ura koasa dia tataru rina ekelesia pa Masedonia meke Akaia si vala ni rini si kaiqa vinariponi, pude toka ni sari na tie habahualadi, saripu koa turani rina tie te Tamasa pa Zerusalema. ²⁷ Qetu nia rini sa dia tinavete hie, ba lopu asa mo; na asa tugo sa dia tinavete, sina ele vagia rini koari na tie Ziu sa tinoa Maqomago tamanaena. Gua asa, ke goto tugo koarini pude toka ni sari na tie Ziu pa kalina poata, meke pa tinitonā hokara.* ²⁸ Pana va hokotia rau sa qua tinavete, pude vala nia sa poata koa rini pa Zerusalema, si kote tiqe topue la pa Sipeini si rau, ba kote atu hopiki ni gamu tu rau pa qua inene la. ²⁹ Meke gilana valeania rau, sapu pana atu kamo rau, si kote tava kamo koa gamu sa minana nomana hola te Zisu Karisito.

³⁰ Ke tepa zonazona gamu rau si gamu kasa na tasiq, pude varavara toka sisigiti nau koe Tamasa, sina ranēa gita sa Baṇara Zisu Karisito, meke ele ponini gita Sa sa tataru koasa Maqomago Hope. ³¹ Mi varavara toka nau, pude qu tava leseve si rau koari pu lopu na tie te Karisito

* 15:25 1 Kor 16:1-4 * 15:27 1 Kor 9:11

pa Ziudia, pude di qetu nia ri na tie te Tamasa pa vasileana Zerusalem sa qua tinavete varitokae vasina. ³² Ke pa hiniva te Tamasa si kote qetu hola si rau pana kamo atu, pude kote variva ninira i si gita. ³³ Sa Tamasa sapu poni nia sa binule koa gita, si mani koa koa gamu doduru, Emeni.

16

Sa Tataru te Paula koari Hopeke Tie pa Roma

¹ Maqu zama leana atu nia koa gamu se Pibi, sa vaveneda pa vinahesi sapu nabulu nia sa ekelesia pa Senekeria. ² Mi va kamo valeania si asa pa hahanana sapu garodi rina nabulu tie te Karisito; mi va tukania pa doduru sirana, gua sapu hivani gamu sa. Ura soku tie si ele toka valeana ni sa, meke gua tugo arau.

³ Tozia qua tataru koari Pirisila meke e Akuila, saripu na qua baere tavetavete koe Zisu Karisito,* ⁴ sapu lopu ruriti dia tinoa, pude toka nau pa tinasuna. Zama leana hola si rau koa rini, meke lopu arau mo, ba doduru ekelesia Zenitailo hire ba gua tugo. ⁵ Mi tozia sa qua tataru koasa ekelesia pu hoke vahesia sa Tamasa pa dia vetu.

Mi tozia tugo sa qua tataru koasa qua baere Ipaenitasi sapu sa tie kekenu hokara koasa pinaqaha popoa Esia pu va hinokaria se Zisu Karisito. ⁶ Qua tataru tugo koe Mere sapu toka sisigitini gamu. ⁷ Tozia tugo sa qua tataru koari Adoronikasi meke Zuniasi, sari na tie Ziu turanaqu pu koa turani rau pa vetu varipusi.

* 16:3 TTA 18:2

Na tie ta gilanadi koari na apositolo si arini, meke lulia rini se Karisito, sipu lopu ele na tie te Karisito si rau.

⁸ Mi tozia tugo sa qua tataru koe Amipiliatasi, sa tie tanisa Baṇara meke na qua baere soti tugo. ⁹ Tozia tugo sa qua tataru koe Urabanasi, sa nada baere tavetavete te Zisu Karisito, meke koe Sitakaisi sa qua baere soti. ¹⁰ Meke koe Apelisi tugo, sapu qetu nia Karisito koasa nana kinalavarae. Meke gua tugo koari kasa pu koa koasa puku tatamana te Arisitobiulasi. ¹¹ Qua tataru tugo koe Herodioni, sa tie Ziu turanaqu, meke tataru koari kasa tasida pu koa pa puku tatamana te Nasisasi.

¹² Tozia tugo qua tataru koari Tarapaena, e Taraeposa, sari barikaleqe sapu nabulu nia sa Baṇara, meke na qua tataru tugo koe Perisi keke barikaleqe pule sapu sa qua baere soti, pu tavetavete va niṇira ponía sa Baṇara. ¹³ Garunu la nia tugo sa qua tataru koe Rupasi, sa nabulu arilaena hola tanisa Baṇara, meke koasa tinana, sapu hoke toka sisigiti nau doduru totošo guana tuna soti.* ¹⁴ Sa qua tataru tugo koari, Esinikiritasi, Pileqoni, Heamasi, Paterobasi, e Hemesi, meke koari tasida pu koadi koarini. ¹⁵ Meke qua tataru tugo koari Piloloqasi, e Zulia meke e Neriasi meke sa vavenena, meke koe Olimipasi, meke koari doduru nabulu te Tamasa saripu koa somanae koarini.

¹⁶ Mi koa varihapahapai pa inaro hope, ura sari doduru ekelesia te Karisito si garunu atu ni koa gamu sari na dia tataru.

* **16:13** Mk 15:21

Sari na Vina Tumatumae Vina Betobeto

¹⁷ Kasa tasiq, maqu zama va ninira atu koa gamu kamahire, mi balau ni sarini pu boka varipaqahani gamu, meke turana va sea i sari na tie koe Karisito, koasa vina tumatumae sapu ele vagia gamu. Mi koa va seu koa rini. ¹⁸ Ura sari na tie gua arini, si loke dia tinokae koasa nada Banara Zisu Karisito. Balabala kale lamo si arini koari na dia ginugua soti teledia. Koari na dia zinama memehedi, meke lomosodi, si va pupuhi ri sari na binalabala tadi na tie pu loke dia ginugua seadi. ¹⁹ Avoso nia ri doduru tie sapu ta ronuemia si gamu koasa Inavoso Leana te Karisito, ke asa sapu qetu nia rau koa gamu, ba hivani gamu rau pude gilana valeania gamu, gua sapu leana, ba lopu tavetia gua sapu kaleana. ²⁰ Ego, sa Tamasa sapu sa natina sa binule, si mani lopu sana toka nigo pude va kilasia se Setani pa kauru nenemu.

Mani koa koa gamu sa tataru variharupi te Zisu sa nada Banara.

²¹ E Timote sa nabulu sapu toka nau, si garunu atunia tugo koa gamu sa nana tataru, meke gua tugo ari Lusiasi, Zesoni meke e Sosipata, sari na tie Ziu turanaqu.*

²² Meke arau Tetiasi sapu kuberia sa leta te Paula pa pepa hie, ba garunu atunia tugo sa qua tataru koa gamu pa korapana e Zisu Karisito.

²³ E Qaeasi sa palabatu sapu kopu nau si arau Paula, si garunu atu nia tugo sa nana tataru koa gamu. Pa vetu tanisa si hoke varigara pa vinahesi sari doduru tie tani. Meke e Erasitasi,

* **16:21** TTA 16:1

sa tie sapu kopu poata tanisa vasileana nomana, meke e Kuatasi sa tasida, ba garunu atu nia tugo sa dia tataru koa gamu.* ²⁴ Mani koa koa gamu sa tataru variharupi tanisa nada Banara, Zisu Karisito, Emeni.*

Tukutuku Vinaravara Vinahesi

²⁵ Mada vahesia sa Tamasa, sapu boka va ninira gamu pa mia rinañerañena sa Inavoso Leana, sapu tarae vura nia rau, sapu sa inavosona e Zisu Karisito sapu ta tome pa totošo puckerane, ²⁶ ba kamahire si tava bakala valeana koari na kinubekubere tadi na poropita. Meke sa Tamasa toa holana si garunu atu ni sari Nana nabulu pude madi tozi vura valeana nia koari doduru butubutu si asa, pude madi va hinokaria na va tabea.

²⁷ Mani ta vala sa vinahesi koasa Tamasa ekeina pu tagoa sa ginilagilana lohina, pa kora-pana Zisu Karisito, ninæ rane ka rane! Emeni.

* **16:23** TTA 19:29; 1 Kor 1:14; 2 Tim 4:20 * **16:24** Kaiqa kinubekubere koadi puckerane si somania sa vesi hie tani meke kaiqa pa vinabetona sa leta.

Buka Hope
The Holy Bible in the Roviana language of the
Solomon Islands
Buk Baibel long langguis Roviana long Solomon
Islands

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

PDF generated using Haiola and XeLaTeX on 11 Nov 2022 from source files dated 30 Nov 2021

2a5324ac-61e8-5e5b-b226-f3d15850d7c5